

旧月
籍词选

東方國民文庫

陳曾壽選

舊月移詞選



康德五年九月廿六日
康德五年九月三十日
印刷發行

〔定價國幣二角五分整〕

〔郵費國幣四分〕

編輯人

新東京特別市長通路三江會館

陳會壽

發行人

新東京特別市大同大街二〇二號

陳邦直

印刷人

新東京特別市西七馬路十四號

滿洲圖書株式會社
駒越五貞

發行所

新東京特別市大同大街二〇二號

滿日文化協會
電話(2)三七四六番

印刷所

新東京特別市西七馬路十四號

滿洲圖書株式會社
電話代表(2)一九一一番

發賣所

新東京特別市二二番地

株式會社 東光書苑
電話(2)五〇四四番
五三〇一番

舊月簞詞選

敘

花開春殘。俄照綠陰。蟲畔秋床。驟聞涼雨。盪羈魂於別館。迴幽緒於閒
悰。縹緲千生。溫涼一念。於斯時也。欲拈韻語。苦詩律之拘嚴。欲敘長
言。奈柔情之斷續。求其追攝神光。低徊本事。微傳掩抑之聲。曲赴墜抗
之節。其惟詞乎。余素工愁恨。雅好倚聲。開卷獲心。曼吟自遣。而古今
選本。微涉異同。酸醜之品。嗜好攸殊。丹素之分。是非在我。一也。區
派別者。多門戶之見。矜位置者。嚴升降之殊。茲則悅異暖姝。迹混愛
薄。二也。義取別裁者。必審矜式之篇。志發幽潛者。每勞罔象之索。茲
則染指不嫌乎異味。適口惟饜乎常羞。三也。網羅期乎備盛。燕雀貴乎均

平。則江海只嘗其一勺。涓滴或重乎千流。茲則或錄多篇。或從蓋闕。無事兼收。從吾所好。四也。具茲四異。趣向自殊。蓋餉世必謹乎義例。而適已但挹其芳香也。雖然。此不必證之於人。斯有異同之別。卽驗之於己。亦有先後之歧焉。窈窕之哀。易鍾於綺歲。代謝之感。每積於中年。情以境遷。境以時易。故有始欣而終厭。初昧而晚覺。要眇之韻。洗耳始聞。深湛之思。鏤心斯見。故有昔遁而今獲。歷久而彌新。昔者賈生遷謫。擬左徒湘澤之文。杜老栖遲。愛開府江關之句。惟身世之相符。卽波瀾之莫二。是以誦青兕之詞。痛先還於塞雁。披碧山之集。助嗚咽於哀蟬。湘雲楚水。目極傷心。蜀鳥吳花。淚零別緒。漁唱三更。驚此身之尙在。嬋娟千里。問歸去以何年。如我意所欲言。宛精魂之猶識。凡在此倫。尤爲獨賞。必欲盡人而悅。含意皆伸。譬諸歌薤露於初筵。奏離鸞於燕爾。謂我

何求。掩耳疾走。固其宜矣。若夫奏歌辭廟。責其揮淚宮娥。扶醉尋釧。怪其忘懷國恥。雖儒生之莊論。非藝苑之達言。夫世無辱主。安有廢興。人盡有心。何貴國士。繹彼哀思。采其馨逸。借酒杯以澆塊壘。授琴引以遣幽憂。不亦可乎。又若樂章諧婉。強半枕席之言。片玉宗工。闌入猥褻之語。後人震於其名。陰觸所好。遂謂其字字珠璣。篇篇瓊玖。擇焉不精。斯爲大惑。夫角枕錦衾。詩人獨且。捐佩投襟。騷客孤懷。曾不肯於國風。何遽淪於桑濮。苟或揣摩爲工。鄙俚爲雅。雖託閒情。亦屬下乘。至其空江烟浪。寄怨梅花。殘月曉風。銷魂柳岸。斯絕世之風神。固雅裁所不廢也。他若南山獻頌。取媚平章。省吏炫才。失身彌遠。諒其迹者。攷歲月之後先。匿其瑕者。謂姓名之疑誤。強爲涵滌。翻近支離。夫秋壑淫威。曾何辭於誤國。楊雄有二。究何解於美新。南園作記。惟應致惜於放翁。

東閣來窺。固可原情於商隱。雖同靜女之歸荑。終異佳人之作賊。律以下流。宜從末減。人不廢言。况茲小道。綜茲數端。自標微尙。取稱褊衷。無關宏旨。未得驅除。學鈍禪之遮眼。聊尋溫熨。同彼美之晤言。一韓遠略。不無惆悵之辭。小范先憂。都化相思之淚。芳菲菲其襲予。鳳縹縹而如訴。日月不居。將忍而與之終古也。

丙子人日蒼虬陳曾壽識

舊月篋詞選

目次

李 白二闕 張志和一闕 白居易二闕 鄭符一闕

段成式一闕 溫庭筠九闕 韋莊七闕 唐無名氏一闕

南唐中宗李景一闕 南唐後主李煜五闕 宋徽宗皇帝一闕 錢惟演一闕

范仲淹三闕 張先二闕 晏殊八闕 宋祁一闕

歐陽修六闕 柳永三闕 王安石二闕 晏幾道九闕

蘇軾十五闕 黃庭堅二闕 秦觀六闕 趙令峙二闕

晁補之四闕 晁沖之一闕 舒亶一闕 朱服一闕

毛滂一闕 李元膺一闕 李之儀二闕 周邦彥十六闕

賀鑄六闕 葉夢得二闕 汪藻一闕 李邴一闕

陳與義五闕 周紫芝二闕 李甲二闕 徐伸一闕

僧	張	李	吳	史	劉	蔡	陸	張	呂	曹
揮	炎	演	文	達	過	幼	游	孝	濱	組
一	六	一	英	祖	一	學	二	祥	老	一
關	關	關	十六	六	關	一	關	二	一	關
李	王	劉	黃	劉	嚴	辛	徐	韓	查	田
清	沂	辰	孝	克	仁	棄	照	元		爲
照	孫	翁	邁	莊	一	疾	一	吉	莖	一
八	六	四	一	四	關	子	關	二	一	關
關	關	關	關	關	關	關	關	關	關	關
朱	仇	周	潘	盧	俞	姜	陳	袁	魯	李
淑			希	祖	國			去	逸	
眞	遠	密	白	阜	寶	夔	亮	華	仲	玉
五	一	六	一	二	一	子	一	三	一	一
關	關	關	關	關	關	關	關	關	關	關
吳	姚	蔣	黃	潘	張	章	范	陸	岳	廖
激	雲		公			良	成			世
二	文	捷	紹	物	鑑	能	大	淞	飛	美
關	一	二	一	一	一	一	四	一	一	一
關	關	關	關	關	關	關	關	關	關	關

舊月篋詞選

李 白

菩 薩 蠻

平林漠漠煙如織。寒山一帶傷心碧。暝色入高樓。有人樓上愁。玉階空
佇立。宿鳥歸飛急。何處是歸程。長亭更短亭。

憶 秦 娥

簫聲咽。秦娥夢斷秦樓月。秦樓月。年年柳色。灞陵傷別。樂游原上清
秋節。咸陽古道音塵絕。音塵絕。西風殘照。漢家陵闕。

張志和

漁歌子

西塞山前白鷺飛。桃花流水鱖魚肥。青箬笠。綠蓑衣。斜風細雨不須歸。

白居易

花非花

花非花。霧非霧。夜半來。天明去。來如春夢不多時。去似朝雲無覓處。

長相思

深畫眉。淺畫眉。蟬鬢鬢。雲滿衣。陽臺行雨迴。巫山高。巫山低。暮
雨瀟瀟郎不歸。空房獨守時。

鄭符

閑中好 題承壽寺

閑中好。盡日松爲侶。此趣人不知。輕風度僧語。

段成式

閑中好

閑中好。塵務不縈心。坐對當窗木。看移三面陰。

溫庭鈞

菩薩蠻

小山重疊金明滅。鬢雲欲度香顚雪。嬾起畫娥眉。弄妝疏洗遲。照花前

後鏡。花面交相映。新貼繡羅襦。雙雙金鷓鴣。

又

水精簾裡頗黎枕。暖香惹夢鴛鴦錦。江上柳如烟。雁飛殘月天。藕絲秋色淺。人勝參差剪。雙鬢隔香紅。玉釵頭上風。

又

玉樓明月長相憶。柳絲裊娜春無力。門外草萋萋。送君聞馬嘶。畫羅金翡翠。香燭銷成淚。花落子規啼。綠窗殘夢迷。

又

牡丹花謝鶯聲歇。綠楊滿院中庭月。相憶夢難成。背窗燈半明。翠鈿金壓臉。寂寞香闌掩。人遠淚闌干。燕飛春又殘。

又

滿宮明月梨花白。故人萬里關山隔。金雁一雙飛。淚痕沾繡衣。小園芳草綠。家住越溪曲。楊柳色依依。燕歸君不歸。

又

寶函鈿雀金鸂鶒。沈香閣上吳山碧。楊柳又如絲。驛橋春雨時。畫樓音信斷。芳草江南岸。鸞鏡與花枝。此情誰得知。

又

竹風輕動庭除冷。珠簾月上玲瓏影。山枕隱濃妝。綠檀金鳳凰。兩蛾愁黛淺。故國吳宮遠。春恨正關情。畫樓殘點聲。

更漏子

玉鑪香。紅蠟淚。偏照畫堂秋思。眉翠薄。鬢雲殘。夜長衾枕寒。梧桐樹。三更雨。不道離情正苦。一葉葉。一聲聲。空階滴到明。

夢江南

梳洗罷。獨倚望江樓。過盡千帆皆不是。斜暉脉脉水悠悠。腸斷白蘋洲。

韋 莊

菩薩蠻

紅樓別夜堪惆悵。香釵半捲流蘇帳。殘月出門時。美人和淚辭。琵琶金翠羽。絃上黃鸞語。勸我早歸家。綠窗人似花。

又

人人盡說江南好。遊人只合江南老。春水碧於天。畫船聽雨眠。鑪邊人似月。皓腕凝霜雪。未老莫還鄉。還鄉須斷腸。

又

如今卻憶江南樂。當時年少春衫薄。騎馬倚斜橋。滿樓紅袖招。翠屏金
屈曲。醉入花叢宿。此度見花枝。白頭誓不歸。

荷葉杯

絕代佳人難得。傾國。花下見無期。一雙愁黛遠山眉。不忍更思惟。閒
掩翠屏金鳳。殘夢。羅幕畫堂空。碧天無路信難通。惆悵舊房櫳。

又

記得那年花下。深夜。初識謝娘時。水堂西面畫簾垂。攜手暗相期。惆
悵曉鶯殘月。相別。從此隔音塵。如今俱是異鄉人。相見更無因。

女冠子

四月十七。正是去年今日。別君時。忍淚佯低面。含羞半斂眉。不知魂
已斷。空有夢相隨。除却天邊月。沒人知。

靜夜寒。樓閣暝。月照青桐金井。深院閉。小庭空。落花香露紅。烟柳
重。春霧薄。鏡背水窗高閣。閒倚戶。暗沾衣。待郎郎不歸。

唐無名氏

後庭宴

千里故鄉。十年華屋。亂魂飛過屏山簇。眼重眉褪不勝春。菱花知我銷香
玉。雙雙燕子歸來。應解笑人幽獨。斷歌空舞。遠恨清江曲。萬樹綠
盡迷。一庭紅撲。載。

南唐中宗李景

山花子

滿宮香銷翠葉殘。西風愁起綠波閒。還與韶光共憔悴。不堪看。細雨夢
歸鷓鴣遠。小樓吹徹玉笙寒。多少淚珠何限恨。倚闌干。

南唐後主李煜

相見歡

無言獨上西樓。月如鉤。寂寞梧桐深院鎖清秋。剪不斷。理還亂。是離
愁。別是一般滋味在心頭。

清平樂

別來春半。觸目愁腸斷。砌下落梅如雪亂。拂了一身還滿。雁來音信無
憑。路遙歸夢難成。離恨恰如春草。更行更遠還生。

浪淘沙

簾外雨潺潺。春意闌珊。羅衾不耐五更寒。夢裡不知身是客。一晌貪歡。獨自暮凭欄。無限江山。別時容易見時難。流水落花春去也。天上人間。

虞美人

春花秋月何時了。往事知多少。小樓昨夜又東風。故國不堪回首月明中。雕欄玉砌應猶在。只是朱顏改。問君能有幾多愁。恰似一江春水向東流。

臨江仙

櫻桃落盡春歸去。蝶翻輕粉雙飛。子規啼月小樓西。玉鈎羅幕。惆悵暮烟垂。別巷寂寥人散後。望殘烟草低迷。鑪香閒裊鳳凰兒。空持羅帶。回首恨依依。

宋徽宗皇帝

燕山亭 北行見杏花

裁翦冰綃。輕疊數重。淡著燕脂勻注。新樣靚妝。豔溢香融。羞煞蕊珠宮女。易得凋零。更多少無情風雨。愁苦。閒院落淒涼。幾番春暮。憑寄離恨重重。這雙燕何曾。會人言語。天遙地遠。萬水千山。知他故宮何處。怎不思量。除夢裏有時曾去。無據。和夢也新來不做。

錢惟演

木蘭花

城上風光鶯語亂。城下煙波春拍岸。綠楊芳草幾時休。淚眼愁腸先已斷。情懷漸覺成衰晚。鸞鏡朱顏驚暗換。昔年多病厭芳尊。今日芳尊惟恐淺。

范仲淹

漁家傲

塞上秋來風景異。衡陽雁去無留意。四面邊聲連角起。千嶂裏。長煙落日孤城閉。濁酒一杯家萬里。燕然未勒歸無計。羌笛悠悠霜滿地。人不寐。將軍白髮征夫淚。

蘇幕遮

碧雲天。黃花地。秋色連波。波上寒煙翠。山映斜陽天接水。芳草無情。更在斜陽外。黯鄉魂。追旅思。夜夜除非。好夢留人睡。明月樓高休獨倚。酒入愁腸。化作相思淚。

御街行

紛紛墜葉飄香砌。夜寂靜。寒聲碎。眞珠簾捲玉樓空。天淡銀河垂地。年

年今夜。月華如練。長是人千里。愁腸已斷無由醉。酒未到。先成淚。
殘釵明滅枕頭敲。語盡孤眠滋味。都來此事。眉閒心上。無計相迴避。

張先

天仙子

水調數聲持酒聽。午醉醒來愁未醒。送春春去幾時回。臨晚鏡。傷流景。
往事後期空記省。沙上並禽池上暝。雲破月來花弄影。重重簾幕密遮鏡。
風不定。人初靜。明日落紅應滿徑。

菩薩蠻

哀箏一弄湘江曲。聲聲寫盡湘波綠。纖指十三絃。細將心事傳。當筵秋
水慢。玉柱斜飛雁。彈到斷腸時。春山眉黛低。

晏殊

浣溪沙

一曲新詞酒一杯。去年天氣舊池臺。夕陽西下幾時回。
無可奈何花落去。似曾相識燕歸來。小園香徑獨徘徊。

又

一向年光有限身。等閒離別易銷魂。酒筵歌席莫辭頻。
滿目山河空念遠。落花風雨更傷春。不如憐取眼前人。

木蘭花

池塘水綠風微暖。記得玉真初見面。重頭歌韻響琤琮。
入破舞腰紅亂旋。玉鉤闌下香階畔。醉後不知斜日晚。
當時共我賞花人。點檢如今無一半。

又

綠楊芳草長亭路。年少拋人容易去。樓頭殘夢五更鐘。花底離愁三月雨。無情不似多情苦。一寸還成千萬縷。天涯地角有窮時。只有相思無盡處。

蹋莎行

祖席離歌。長亭別宴。香塵已隔猶迴面。居人匹馬映林嘶。行人去棹依波轉。畫閣魂銷。高樓日斷。斜陽只送平波遠。無窮無盡是離愁。天涯地角尋思徧。

又

小徑紅稀。芳郊綠遍。高臺樹色陰陰見。春風不解禁楊花。濛濛亂撲行人面。翠葉藏鶯。朱簾隔燕。鑪香靜透游絲轉。一場愁夢酒醒時。斜陽卻照深深院。

清平樂

金風細細。葉葉梧桐墜。綠酒初嘗人易醉。一枕小窗濃睡。紫薇朱槿花
。斜陽卻照闌干。雙燕欲歸時節。銀屏昨夜微寒。

蝶戀花

六曲闌干偎碧樹。楊柳風輕。展盡黃金縷。誰把鈿箏移玉柱。穿簾海燕雙
。夢上。滿眼游絲兼落絮。紅杏開時。一霎清明雨。濃睡覺來鶯亂語。驚
殘好夢無尋處。

宋 祁

木蘭花

東城漸覺風光好。皺縠波紋迎客棹。綠楊烟外曉雲輕。紅杏枝頭春意鬧。
浮生長恨歡娛少。肯愛千金輕一笑。爲君持酒勸斜陽。且向花間留晚照。

歐陽修

踏莎行

候館梅殘。溪橋柳細。草薰風暖搖征轡。離愁漸遠漸無窮。迢迢不斷如春水。一寸柔腸。盈盈粉淚。樓高莫近危欄倚。平蕪盡處是春山。行人更在春山外。

蝶戀花

庭院深深深幾許。楊柳堆烟。簾幕無重數。玉勒雕鞍游冶處。樓高不見章臺路。雨橫風狂三月暮。門掩黃昏。無計留春住。淚眼問花花不語。亂紅飛過鞦韆去。

又

幾日行雲何處去。忘了歸來。不道春將暮。百草千花寒食路。香車繫在誰

家樹。淚眼倚樓頻獨語。雙燕來時。陌上相逢否。撩亂春愁如柳絮。依
依夢裏無尋處。

臨江仙

柳外輕雷池上雨。雨聲滴碎荷聲。小樓西角斷虹明。闌干倚處。待得月華
生。燕子飛來窺畫棟。玉鈎垂下簾旌。涼波不動篔簹紋平。水精雙枕。傍
有墮釵橫。

蝶戀花

誰道閒情拋棄久。每到春來。惆悵還依舊。日在花前常病酒。不辭鏡裏朱
顏瘦。河畔青蕪隄上柳。爲問新愁。何事年年有。獨立小橋風滿袖。平
林新月人歸後。

浪淘沙

把酒祝東風。且共從容。垂楊紫陌洛城東。總是當時攜手處。游徧芳叢。
聚散苦匆匆。此恨無窮。今年花勝去年紅。可惜明年花更好。知與誰同。

柳 永

雨霖鈴

寒蟬淒切。對長亭晚。驟雨初歇。都門帳飲無緒。方留戀處。蘭舟催發。
執手相看淚眼。竟無語凝噎。念去去千里煙波。暮靄沈沈楚天闊。多情
自古傷離別。更那堪冷落清秋節。今宵酒醒何處。楊柳岸曉風殘月。此去
經年。應是良辰好景虛設。便縱有千種風情。更與何人說。

八聲甘州

對瀟瀟暮雨灑江天。一番洗清秋。漸霜風淩緊。關河冷落。殘照當樓。是

處紅衰翠減。再萼物華休。惟有長江水。無語東流。不忍登高臨遠。望故鄉渺邈。歸思難收。歎年來踪跡。何事苦淹留。想佳人妝樓凝望。誤幾回天際識歸舟。爭知我倚闌干處。正恁凝愁。

蝶戀花

妙倚危樓風細細。望極春愁。黯黯生天際。草色煙光殘照裏。無言誰會憑闌意。擬把疏狂圖一醉。對酒當歌。強樂還無味。衣帶漸寬終不悔。爲伊消得人憔悴。

王安石

桂枝香

登臨送目。正故國晚秋。天氣初肅。千里澄江似練。翠峰如簇。歸帆去棹

斜陽裏。背西風。酒旗斜矗。彩舟雲淡。星河鷺起。畫圖難足。念往昔繁華競逐。歎門外樓頭。悲恨相續。千古憑高對此。漫嗟榮辱。六朝舊事如流水。但寒煙衰草凝綠。至今商女。時時猶唱。後庭遺曲。

千秋歲引

別館寒砧。孤城畫角。一派秋聲入寥廓。東歸燕從海上去。南來雁向沙頭落。楚臺風。庾樓月。宛如昨。無奈被些名利縛。無奈被他情擔閣。可惜風流總閒却。當初漫留華表語。而今誤我秦樓約。夢闌時。酒醒後。思量著。

晏幾道

臨江仙

夢後樓臺高鎖。酒醒簾幕低垂。去年春恨却來時。落花人獨立。微雨燕雙飛。記得小蘋初見。兩重心字羅衣。琵琶絃上說相思。當時明月在。曾照彩雲歸。

鷓鴣天

彩袖殷勤捧玉鍾。當年拚却醉顏紅。舞低楊柳樓心月。歌盡桃花扇底風。從別後。憶相逢。幾回魂夢與君同。今宵賸把銀缸照。猶恐相逢是夢中。

又

醉拍春衫惜舊香。天將離恨惱疏狂。年年陌上生秋草。日日樓中到夕陽。雲渺渺。水茫茫。征人歸路許多長。相思本是無憑語。莫向花牋費淚行。

木蘭花

東風又作無情計。豔粉嬌紅吹滿地。碧羅簾影不遮愁。還似去年今日意。

誰知錯管春殘事。到處登臨曾費淚。此時金盞直須深。看盡落花能幾醉。

蝶戀花

夢入江南煙水路。行盡江南。不與離人遇。睡裏消魂無說處。覺來惆悵消魂誤。欲盡此情書尺素。浮雁沈魚。終了無憑據。卻倚綏絃歌別緒。斷腸移破秦箏柱。

又

醉別西樓醒不記。春夢秋雲。聚散真容易。斜月半窓還少睡。畫屏閒展吳山翠。衣上酒痕詩裏字。點點行行。總是淒涼意。紅燭自憐無好計。夜寒空替人垂淚。

生查子

金鞍美少年。去躍青驄馬。牽繫玉樓人。繡被春寒夜。消息未歸來。寒

食梨花謝。無處說相思。背面鞦韆下。

阮 郎 歸

天邊金掌露成霜。雲隨雁字長。綠杯紅袖趁重陽。人情似故鄉。蘭佩
紫。菊簪黃。殷勤理舊狂。欲將沈醉換悲涼。清歌莫斷腸。

滿 庭 芳

南苑吹花。西樓題葉。故園歡事重重。憑闌秋思。閒記舊相逢。幾處歌雲
夢雨。可憐便流水西東。別來久。淺情未有。錦字繫征鴻。年光還少
味。閒殘檻菊。落盡溪桐。漫留得尊前。淡月淒風。此恨誰堪共說。清愁
付綠酒杯中。佳期在。歸時待把。香袖看啼紅。

蘇 軾

水龍吟 次韻章質夫楊花詞

似花還似非花。也無人惜從教墜。拋家傍路，思量却是無情有思。縈損柔腸，困酣嬌眼。欲開還閉。夢隨風萬里。尋郎去處。又還被鶯呼起。
不恨此花飛盡。恨西園落紅難綴。曉來雨過。遺蹤何在。一池萍碎。春色三分。二分塵土。一分流水。細看來不是。楊花點點。是離人淚。

水調歌頭

丙辰中秋歡飲達旦作此篇兼懷子由

明月幾時有。把酒問青天。不知天上宮闕。今夕是何年。我欲乘風歸去。惟恐瓊樓玉宇。高處不勝寒。起舞弄清影。何似在人間。轉朱閣。低綺戶。照無眠。不應有恨。何事長向別時圓。人有悲歡離合。月有陰晴圓缺。此事古難全。但願人長久。千里共嬋娟。

念奴嬌 赤壁懷古

大江東去。浪淘盡千古。風流人物。故壘西邊人道是。三國周郎赤壁。亂石崩雲。驚濤裂岸。捲起千堆雪。江山如畫。一時多少豪傑。遙想公瑾當年。小喬初嫁了。雄姿英發。羽扇綸巾談笑間。強虜灰飛煙滅。故國神遊。多情應笑我。早生華髮。人生如夢。一尊還酹江月。

青玉案 送伯固歸吳中

三年枕上吳中路。遣黃犬隨君去。若到松江呼小渡。莫驚鴛鴦。四橋盡是。老子經行處。輞川圖上看春暮。常記高人右丞句。作箇歸期天定許。春衫猶是。小蠻斜線。曾濕西湖雨。

卜算子 黃州定惠院寓居作

缺月挂疏桐。漏斷人初靜。誰見幽人獨往來。縹緲孤鴻影。驚起却回頭。有恨無人省。揀盡寒枝不肯棲。寂寞沙洲冷。

臨江仙

夜飲東坡醒復醉。歸來彷彿三更。家童鼻息已雷鳴。敲門都不應。倚杖聽江聲。長恨此身非我有。何時忘却營營。夜闌風靜穀紋平。小舟從此逝。江海寄餘生。

江城子 乙卯正月二十日夜記夢

十年生死兩茫茫。不思量。自難忘。千里孤墳。無處話淒涼。縱使相逢應不識。塵滿面。鬢如霜。夜來幽夢忽還鄉。小軒窗。正梳妝。相顧無言。惟有淚千行。料得年年腸斷處。明月夜。短松崗。

賀新郎

乳燕飛華屋。悄無人、槐陰轉午。晚涼新浴。手弄生綃白團扇。扇手一時似玉。漸困倚、孤眠清熟。簾外誰來推繡戶。枉教人夢斷瑤臺曲。又却是。風

敲竹。石榴半吐紅巾蹙。待浮花浪蕊都盡。伴君幽獨。穠豔一枝細看取。芳心千重似束。又恐被西風驚綠。若待得君來向此。花前對酒不忍觸。共粉淚。兩歛歛。

西江月

三過平山堂下。半生彈指聲中。十年不見老仙翁。壁上龍蛇飛動。欲弔文章太守。仍歌楊柳春風。休言萬事轉頭空。未轉頭時似夢。

行香子

病起小集

昨夜霜風。先入梧桐。渾無處回避衰容。問公何事。不語書空。但一回醉。一回病。一回慵。朝來庭下。飛英如霰。似無言有意催儂。都將萬事。付與千鐘。任酒花白。眼花亂。燭花紅。

山下蘭芽淺浸溪。松閒沙路淨無泥。蕭蕭暮雨子規啼。誰道人生無再少。門前流水尙能西。休將白髮唱黃雞。

西江月

頃在黃州春夜行蘄水中過酒家飲酒醉乘月至一溪橋上解鞍曲肱醉臥少休及已晚亂山攪擁流水鏘然疑非塵世也書此語橋柱上

照野瀾瀾淺浪。橫空隱隱層霄。障泥未解玉驄驕。我欲醉眠芳草。可惜一溪風月。莫教蹋碎瓊瑤。解鞍欹枕綠楊橋。杜宇一聲春曉。

永遇樂

彭城夜宿燕子樓夢盼盼因作此詞

明月如霜。好風如水。清景無限。曲港跳魚。園荷瀉露。寂寞無人見。絀如三鼓。鏗然一葉。黯黯夢雲驚斷。夜茫茫重尋無處。覺來小園行遍。

天涯倦客。山中歸路。望斷故園心眼。燕子樓空。佳人何在。空鎖樓中燕。古今如夢。何曾夢覺。但有舊歡新怨。異時對黃樓夜景。爲予浩歎。

定風波

三月三日沙湖道中遇雨雨具先去同行皆狼狽予不覺已而遂晴故作此

莫聽穿林打葉聲。何妨吟嘯且徐行。竹杖芒鞋輕勝馬。誰怕。一簑烟雨任平生。
料峭春風吹酒醒。微冷。山頭斜照卻相迎。回首向來蕭瑟處。歸去。也無風雨也無晴。

洞仙歌

余七歲時見眉州老尼姓朱忘其名年九十歲自言嘗隨其師入蜀主孟昶宮中一日大熱蜀主與花蕊夫人夜納涼摩訶池上作一詞朱具能記之今四十年來朱已死久矣人無知此詞者但記其首兩句暇日尋味豈洞仙歌令乎乃爲足之云

冰肌玉骨。自清涼無汗。水殿風來暗香滿。繡簾開一點明月窺人。人未寢。敲枕釵橫鬢亂。起來携素手。庭戶無聲。時見疏星度河漢。試問夜如何。夜已三更。金波淡玉繩低轉。但屈指西風幾時來。又不道流年暗
中偷換。

鷓鴣天 坐中有眉山隱客史應之和前韻卽席答之

黃菊枝頭生曉寒。人生莫放酒杯乾。風前橫笛斜吹雨。醉裏簪花到著冠。
身健在。且加餐。舞裙歌板盡情歡。黃花白髮相牽挽。付與時人冷眼看。

定風波 次高左藏使君韻

萬里黔中一漏天。屋居終日似乘船。及至重陽天也霽。催醉。鬼門關近蜀江前。
莫笑老翁猶氣岸。君看。幾人白髮上華顛。戲馬臺前追兩謝。馳射。風情猶拍古人肩。

秦觀

望海潮

梅英疏淡。冰澌溶洩。東風暗送年華。金谷俊游。銅駝巷陌。新晴細履平

沙。長記誤隨車。正絮翻蝶舞。芳思交加。柳下桃蹊。亂分春色到人家。

西園夜飲鳴笳。有華鏐礙月。飛蓋妨花。蘭苑未空。行人漸老。重來是事堪嗟。烟暝酒旗斜。但倚樓極目。時見栖鴉。無奈歸心。暗隨流水到天涯。

滿庭芳

山抹微雲。天黏衰草。畫角聲斷譙門。暫停征棹。聊共引離尊。多少落葉
舊事。空回首烟靄紛紛。斜陽外。寒鴉數點。流水繞孤村。消魂當此
際。香囊暗解。羅帶輕分。漫贏得青樓。薄倖名存。此去何時見也。襟袖
上空惹啼痕。傷情處。高城望斷。燈火已黃昏。

又

晚色雲開。春隨人意。驟雨纔過還晴。古亭芳榭。飛燕澹紅英。舞困榆錢

自落。鞦韆外綠水橋平。東風裏。朱門映柳。低按小秦箏。多情行樂處。
珠鈿翠蓋。玉轡紅纓。漸酒空金盞。花困蓬瀛。豆蔻梢頭舊恨。十年夢屈
指堪驚。憑闌久。疏烟淡日。寂寞下燕城。

踏莎行

霧失樓臺。月迷津渡。桃源望斷無尋處。可堪孤館閉春寒。杜鵑聲裡斜陽
暮。驛寄梅花。魚傳尺素。砌成此恨無重數。郴江幸自繞郴州。爲誰流
下瀟湘去。

阮郎歸

湘天風雨破愁初。深沉庭院虛。麗譙吹罷小單于。迢迢清夜徂。鄉夢
斷。旅魂孤。崢嶸歲又除。衡陽猶有雁傳書。郴陽和雁無。

浣溪沙

漠漠輕寒上小樓。曉陰無賴似窮秋。淡煙流水畫屏幽。自在飛花輕似夢。無邊絲雨細如愁。寶簾閑掛小銀鈎。

趙令峙

蝶戀花

欲減羅衣寒未去。不捲珠簾。人在深深處。紅杏枝頭花幾許。啼痕止恨清
明雨。盡日沈香煙一縷。宿酒醒遲。惱破春情緒。飛燕又將歸信誤。小
屏風上西江路。

又

捲絮風頭寒欲盡。墜粉飄香。日日紅成陣。新酒又添殘酒困。今春不減前
春恨。蝶去鶯飛無處問。隔水高樓。望斷雙魚信。惱亂橫波秋一寸。斜

陽只與黃昏近。

晁補之

憶少年別歷下

無窮官柳。無情畫舸。無根行客。南山尙相送。只高城人隔。罨畫園林
溪紺碧。算重來盡成陳迹。劉郎鬢如此。況桃花顏色。

洞仙歌 泗州中秋作

青煙幕處。碧海飛天鏡。永夜閒階臥桂影。露涼時零亂多少寒蟬。神京遠。
惟有藍橋路近。水晶簾不下。雲母屏開。冷浸佳人淡脂粉。待都將許多。
明付與金尊。投曉共流霞傾盡。更携取胡床上南樓。看玉做人閒。素秋千
頃。

鹽角兒 毫社觀梅

開時似雪。謝時似雪。花中奇絕。香非在蕊。香非在萼。骨中香徹。占
溪風。留溪月。堪羞損山桃如血。直饒更疏疏淡淡。終有一般情別。

水龍吟 次韻林聖予惜春

問春何苦恩惠。帶風伴雨如馳驟。幽葩細萼。小園低檻。壅培未就。吹盡
繁紅。占春長久。不如垂柳。算春長不老。人愁春老。愁只是。人間有。
春恨十常八九。忍輕孤芳膠經口。那知自是。桃花結子。不因春瘦。世上
功名。老來風味。春歸時候。最多情猶有尊前青眼。相逢依舊。

晁沖之

臨江仙

憶昔西池池上飲。年年多少歡娛。別來不寄一行書。尋常相見了。猶道不如初。安穩錦衾今夜夢。月明好渡江湖。相思休問定何如。情知春去後。管得落花無。

舒 亶

虞美人

芙蓉落盡天涵水。日暮滄波起。背飛雙燕貼雲寒。獨向小樓東畔倚闌看。浮生只合尊前老。雪滿長安道。故人早晚上高臺。寄我江南春色一枝梅。

朱 服

漁家傲

小雨纖纖風細細。萬家楊柳青煙裏。戀樹溼花飛不起。愁無際。和春付與東流水。九十光陰能有幾。金龜解盡留無計。寄語東陽沽酒市。拚一醉。而今樂事他年淚。

毛滂

惜分飛 富陽僧舍作別語贈妓瓊芳

淚溼闌干花著露。愁到眉峰碧聚。此恨平分取。更無言語空相覩。斷雨殘雲無意緒。寂寞朝朝暮暮。今夜山深處。斷魂分付潮回去。

李元膺

洞仙歌

一年春物惟梅柳閒意味最深至鶯花爛漫時則春已衰遲使人無復新意余作洞仙歌使探春者歌之無後時之悔

雪雲散盡。放曉晴庭院。楊柳於人便青眼。更風流多處一點梅心。相映遠。約略顰輕笑淺。一年春好處。不在濃芳。小豔疏香最嬌軟。到清明時候。百紫千紅。花正亂。已失春風一半。早占取韶光共追游。但莫管春寒。醉紅自暖。

李之儀

謝池春

殘寒消盡。疏雨過清明後。花徑款餘紅。風沼縈新皺。乳燕穿庭戶。飛絮沾襟袖。正佳時。仍晚晝。著人滋味。眞箇濃如酒。頻移帶眼。空只恁。厭厭瘦。不見又思量。見了還依舊。爲問頻相見。何似長相守。天不老。人未偶。且將此恨。分付庭前柳。

卜算子

我住長江頭。君住長江尾。日日思君不見君。共飲長江水。此水幾時休。此恨何時已。只願君心似我心。定不負相思意。

周邦彥

蘭陵王

柳陰直。煙裏絲絲弄碧。隋堤上。曾見幾番。拂水飄綿送行色。登臨望故國。誰識京華倦客。長亭路。年去歲來。應折柔條過千尺。閒尋舊踪跡。又酒趁哀絃。鐙照離席。梨花榆火催寒食。愁一箭風快。半篙波暖。回頭迢遞便數驛。望人在天北。悽惻。恨堆積。漸別浦縈迴。津埃岑寂。斜陽冉冉春無極。念月榭携手。露橋聞笛。沈思前事。似夢裡。淚暗滴。

瑣窗寒

暗柳啼鴉。單衣竚立。小簾朱戶。桐花半畝。靜鎖一庭愁雨。灑空階夜闌未休。故人剪燭西窗語。似楚江暝宿。風鈴零亂。少年羈旅。遲暮。嬉游處。正店冷無烟。禁城百五。旗亭喚酒。付與高陽儔侶。想東園桃李自春。小脣秀靨今在否。到歸時定有殘英。待客携尊俎。

六

醜蔷薇謝後作

正單衣試酒。悵客裡光陰虛擲。願春暫留。春歸如過翼。一去無迹。爲問家何在。夜來風雨。葬楚宮傾國。釵鈿墜處遺香澤。亂點桃蹊。輕翻柳陌。多情爲誰追惜。但蜂媒蝶使。時叩窗隔。東園岑寂。漸蒙籠暗碧。靜繞珍叢底。成歎息。長條故惹行客。似牽衣待話。別情無極。殘英小強簪巾幘。終不似一朶釵頭顫裊。向人敬側。漂流處莫趁潮汐。恐斷紅尙有

相思字。何由見得。

夜飛鵲

河橋送人處。涼夜何其。斜月遠墮餘輝。銅盤燭淚已流盡。霏霏涼露沾衣。相將散離會。探風前津鼓。樹杪參旗。花驄會意。縱揚鞭亦自行遲。迢遞路回清野。人語漸無聞。空帶愁歸。何意重經前地。遺鈿不見。斜逕都迷。兔葵燕麥。向斜陽欲與人齊。但徘徊班草。欲歔酌酒。極望天西。

滿庭芳

夏日溧水無想山作

風老鶯雛。雨肥梅子。午陰嘉樹清圓。地卑山近。衣潤費鑪煙。人靜烏鳶自樂。小橋外新綠濺濺。凭闌久。黃蘆苦竹。疑泛九江船。年年如社燕。飄流瀚海。來寄脩椽。且莫思身外。長近尊前。憔悴江南倦客。不堪聽。急管繁絃。歌筵畔。先安枕簟。容我醉時眠。

花 犯

粉牆低。梅花照眼。依然舊風味。露痕輕綴。疑淨洗鉛華。無限佳麗。去年勝賞曾孤倚。冰盤同燕喜。更可惜雪中高樹。香篝熏素被。今年對花最恩思。相逢似有恨。依依愁悴。吟望久。青苔上旋看飛墜。相將見。翠丸薦酒。人正在空江烟浪裡。但夢想一枝瀟灑。黃昏斜照水。

蝶戀花

月皎驚鳥棲不定。更漏將闌。輾轆牽金井。喚起兩眸清炯炯。淚花落枕紅綿冷。執手霜風吹鬢影。去意徊徨。別語愁難聽。樓上闌干橫斗柄。露寒人遠雞相應。

拜星月慢

夜色催更。清塵收露。小曲幽坊月暗。竹檻鐙窗。識秋娘庭院。笑相遇。

覺瓊枝玉樹相倚。暖日明霞光爛。水盼蘭情。總平生稀見。畫圖中。省
識春風面。誰知道。自到瑤臺畔。春戀雨潤雲溫。苦驚風吹散。念荒
寒。寄宿無人館。重門閉。敗壁秋蟲歎。怎奈向一縷相思。隔溪山不斷。

西河 金陵懷古

佳麗地。南朝盛事誰記。山圍故國繞清江。髻鬟對起。怒濤寂寞打孤城。
風檣遙度天際。斷崖樹。猶倒倚。莫愁艇子誰繫。空餘舊迹鬱蒼蒼。霧
沈半壘。夜深月過女牆來。傷心東望淮水。酒旗戲鼓甚處市。想依稀王
謝鄰里。燕子不知何世。向尋常巷陌人家。相對如說興亡。斜陽裡。

夜游宮

葉下斜陽照水。捲輕浪沈沈千里。橋上酸風射眸子。立多時。看黃昏。鐙
火市。古屋寒窗底。聽幾片井桐飛墜。不戀單衾再三起。有誰知。爲

蕭娘。書一紙。

解連環

怨懷無託。嗟情人斷絕。信音遼邈。縱妙手能解連環。似風散雨收。霧輕雲薄。燕子樓空。暗塵鎖一牀絃索。想移根換葉。盡是舊時。手種紅藥。汀州漸生杜若。料舟依岸曲。人在天角。漫記得當日音書。把閒語聞言。待總燒卻。水驛春回。望寄我江南梅萼。拚今生對花對酒。爲伊淚落。

尉遲杯

隋堤路。漸日晚密靄生烟樹。陰陰淡月籠沙。還宿河橋深處。無情畫舸。都不管烟波隔前浦。等行人醉擁重衾。載將離恨歸去。因思舊客京華。長俛傍疏林。小檻歡聚。冶葉倡條俱相識。仍慣見珠歌翠舞。如今向漁村水驛。夜如歲。焚香獨自語。有何人念我無聊。夢魂凝想鴛侶。

綺寮怨

上馬人扶殘醉。曉風吹未醒。映水曲翠瓦朱檐。垂楊裡乍見津亭。當時曾題敗壁。蛛絲罩。淡墨苔暈青。念去來歲月如流。徘徊久。歎息愁思盈。去去倦尋路程。江陵舊事。何曾再問楊瓊。舊曲淒清。歛愁黛。與誰聽。尊前故人如在。想念我最關情。何須渭城。歌聲未盡處。先淚零。

瑞龍吟

章臺路。還見褪粉梅梢。試花桃樹。愔愔坊陌人家。定巢燕子。歸來舊處。黯凝竅。因念箇人癡小。乍窺門戶。侵晨淺約宮黃。障風映袖。盈盈笑語。前度劉郎重到。訪鄰尋里。同時歌舞。惟有舊家秋娘。聲價如故。吟牋賦筆。猶記燕臺句。知誰伴、名園露飲。東城閒步。事與孤鴻去。探春盡是。傷離意緒。官柳低金縷。歸騎晚。纖纖池塘飛雨。斷腸院落。

一簾風絮。

大 酺

對宿煙收。春禽靜。飛雨時鳴高屋。牆頭青玉旆。洗鉛霜都盡。嫩梢相觸。潤逼琴絲。寒侵枕障。蟲網吹黏。簾竹。郵亭無人處。聽檐聲不斷。困眠初熟。奈愁極頻驚。夢輕難記。自憐幽獨。行人歸意速。最先念流潦妨車轍。怎奈向、蘭成憔悴。衛玠清羸。等閒時易傷心目。未怪平陽客。雙淚落笛中哀曲。況蕭索青蕪國。紅糝鋪地。門外荆桃如菽。夜游共誰秉燭。

解 語 花 上元

風消燄蠟。露浥烘鑪。花市光相射。桂華流瓦。纖雲散耿。耿素娥欲下。衣裳淡雅。看楚女纖腰一把。簫鼓喧人影參差。滿路飄香麝。因念都城放夜。望千門如畫。嬉笑游冶。鈿車羅帕。相逢處。自有暗塵隨馬。年光是

也。惟只見舊情衰謝。清漏移。飛蓋歸來。從舞休歌罷。

四八

賀鑄

天門謠

牛渚天門險。限南北。七雄豪占。清霧斂。與閒人登覽。待月上潮平波
濺濺。塞管輕吹新阿濫。風滿檻。歷歷數西州更點。

蝶戀花

幾許傷春復暮。楊柳清陰。偏礙游絲度。天際小山桃葉步。白蘋花滿瀟
湘處。竟日微吟長短句。簾影燈昏。心寄胡琴語。數點雨聲風約住。朦
朧淡月雲來去。

浣溪沙

樓角初消一縷霞。淡黃楊柳暗棲鴉。玉人和月摘梅花。笑撚粉香歸洞戶。更垂簾幕護窗紗。東風寒似夜來些。

薄倖

淡妝多態。更的的頻回眄睐。便認得琴心先許。欲綰合歡雙帶。記畫堂風月逢迎。輕顰淺笑嬌無奈。向睡鴨鑪邊。翔鴛屏裏。羞把香羅暗解。自過了燒鐙後。都不見踏青挑菜。幾回憑雙燕。丁甯深意。往來卻恨重簾礙。約何時再。正春濃酒困。人間畫水無聊賴。厭厭睡起。猶有花梢日在。

青玉案

凌波不過橫塘路。但目送芳塵去。錦瑟華年誰與度。月橋花院。瑣窗朱戶。只有春知處。飛雲冉冉蘅皋暮。彩筆新題斷腸句。試問閒愁都幾許。一川煙草。滿城風絮。梅子黃時雨。

更漏子

上東門。門外柳。贈別每煩纖手。一葉落。幾番秋。江南獨倚樓。曲闌
干。凝竚久。薄暮更堪搔首。無際恨。見閒愁。侵尋天盡頭。

葉夢得

賀新郎

睡起流鶯語。掩蒼苔房櫳向晚。亂紅無數。吹盡殘花無人見。惟有垂楊自
舞。漸暖靄初回輕暑。寶扇重尋明月影。暗塵侵上有乘鸞女。驚舊恨。遽
如許。江南夢斷橫江渚。浪黏天葡萄漲綠。半空煙雨。無限樓前滄波意。
誰采蘋花寄取。但悵望蘭舟容與。萬里雲帆何時到。送孤鴻目斷千山阻。
誰爲我。唱金縷。

虞美人 雨後同韓譽才卿置酒來禽花下作

落花已作風前舞。又送黃昏雨。曉來庭院半殘紅。惟有游絲千丈、嫋晴空。
殷勤花下同攜手。更盡杯中酒。美人不用斂蛾眉。我亦多情無奈酒闌時。

汪藻

點絳脣

新月娟娟。夜寒江靜山銜斗。起來搔首。梅影橫窗瘦。
好箇霜天。閉卻傳杯手。君知否。亂鴉啼後。歸興濃如酒。

李邴

漢宮春

瀟灑江梅。向竹梢疏處。橫兩三枝。東君也不愛惜。雪壓霜欺。無情燕子。怕春寒輕失花期。却是年年塞雁。歸來曾見開時。清淺小溪如練。問玉堂何似。茅舍疏籬。傷心故人去後。冷落新詩。微雲淡月。對江天分付他誰。空自憶清香未減。風流不在人知。

陳與義

臨江仙

高詠楚詞酬午日。天涯節序怱怱。榴花不似舞裙紅。無人知此意。歌罷滿簾風。萬事一身傷老矣。戎葵凝笑牆東。酒盃深淺去年同。試澆橋下水。今夕到湘中。

臨江仙

憶昔午橋橋上飲。坐中多是豪英。長溝流月去無聲。杏花疏影裏，吹笛到天明。二十餘年如一夢。此身雖在堪驚。閒登小閣看新晴。古今多少事，漁唱起三更。

法駕導引

朝元路。朝元路。同駕玉華君。千乘載花紅一色。人間遙指是祥雲。回望海光新。

又

東風起。東風起。海上百花搖。十八風鬟雲半動。飛花和雨着輕綃。歸路碧迢迢。

又

簾漠漠。簾漠漠。天澹一簾秋。自洗玉舟斟白醴。月華微映是空舟。歌罷

海西流。

周紫芝

鷓鴣天

一點殘紅欲盡時。乍涼秋氣滿屏幃。梧桐葉上三更雨。葉葉聲聲是別離。
調寶瑟。撥金猊。那時同唱鷓鴣詞。如今風雨西樓夜。不聽清歌也淚垂。

蹋莎行

情似游絲。人如飛絮。淚珠閣定空相覷。一溪烟柳萬絲垂。無因繫得蘭舟住。
雁過斜陽。草迷烟渚。如今已是愁無數。明朝且做莫思量。如何過得今宵去。

李 甲

帝 臺 春

芳草碧色。萋萋徧南陌。暖絮亂紅。也似知人。春愁無力。憶得盈盈拾翠
侶。共携賞。鳳城寒食。到今來。海角逢春。天涯爲客。愁旋釋。還似
織。淚暗拭。又偷滴。漫倚遍荒欄。儘黃昏。也只是暮雲凝碧。拚則而今
已拚了。忘則怎生便忘得。又還問鱗鴻。試重尋消息。

憶 王 孫

萋萋芳草憶王孫。柳外樓高空斷魂。杜宇聲聲不忍聞。欲黃昏。雨打梨花
深閉門。

徐 伸

二郎神

悶來彈鵲。又攪碎一簾花影。漫試著春衫。還思纖手。熏徹金猊燼冷。動是愁端如何向。但怪得新來多病。嗟舊日沈腰。如今潘鬢。怎堪臨鏡。重省。別時淚溼。羅衣猶凝。料爲我厭厭。日高慵起。長託春醒未醒。雁足不來。馬蹄難駐。門掩一庭芳景。空竚立。盡日闌干倚徧。晝長人靜。

曹 組

慈山溪梅

洗妝真態。不作鉛華御。竹外一枝斜。想佳人天寒日暮。黃昏院落。無處著清香。風細細。雪垂垂。何況江頭路。月邊疏影。夢到消魂處。結子欲黃時。又須作寒澌細雨。孤芳一世。供斷有情愁。消瘦損。東湯也。試

問花知否。

田 爲

江神子慢

玉臺挂秋月。鉛素淺梅花傳香雪。冰姿潔。金蓮襯。小小凌波羅襪。雨初歇。樓外孤鴻聲漸遠。遠山外行人音信絕。此恨對語猶難。那堪更寄書說。教人紅消翠減。覺衣寬金縷。都爲輕別。太情切。消魂處。畫角黃昏時節。聲嗚咽。落盡庭花春去也。銀蟾迴。無情圓又缺。恨伊不似餘香。惹鴛鴦結。

李 玉

賀新郎

篆縷消金鼎。醉沈沈庭陰轉午。畫堂人靜。芳草王孫知何處。惟有楊花糝
徑。漸玉枕騰騰春醒。簾外殘紅春已透。鎮無聊殢酒厭厭病。雲鬢亂。未
忺整。江南舊事休重省。徧天涯尋消問息。斷鴻難倩。月滿西樓憑欄
久。依舊歸期未定。又只恐瓶沈金井。嘶騎不來銀燭暗。枉教人立盡梧桐
影。誰伴我。對鸞鏡。

廖世美

燭影搖紅 題安陸浮雲樓

靄靄春空。畫樓森聳凌雲渚。紫薇登覽最關情。絕妙誇能賦。惆悵相思遲
暮。記當日朱闌共語。塞鴻難問。岸柳何窮。別愁紛絮。催促年光。舊

來流水知何處。斷腸何必更殘陽。極目傷平楚。晚霽波聲帶雨。悄無人舟橫野渡。數峰江上。芳草天涯。參差煙樹。

呂濱老

薄倖

青樓春晚。晝寂寂梳勻又懶。乍聽得鴉啼鶯啞。惹起新愁無限。記年時偷擲春心。花前隔霧遙相見。便角枕題詩。寶釵貫酒。共醉青苔深院。怎忘得迴廊下。携手處花明月滿。如今但暮雨。蜂愁蝶恨。小窗閒對芭蕉展。卻誰拘管。儘無言。閒品秦箏。淚滿參差雁。腰肢漸小。心與楊花共遠。

查 莖

透碧霄

橫蘭舟。十分端是載離愁。練波送遠。屏山遮斷。此去難留。相從爭奈。
心期久要。屢變霜秋。歎人生杳似萍浮。又翻成輕別。都將深恨。付與東
流。想斜陽影裏。寒煙明處。雙漿去悠悠。愛渚梅幽香動。須采掇倩纖
柔。豔歌粲發。誰傳餘韻。來說仙游。念故人留此。還州。但春風老後。秋
月圓時。獨倚江樓。

魯逸仲

南浦

風悲畫角。聽單于三弄。落譙門。投宿駭駭征騎。飛雪滿孤邨。酒市漸闌燈
火。正敲窗亂葉舞紛紛。送數聲鶯雁。乍離煙水。嘹唳度寒雲。好在半

隴淡月。到如今無處不消魂。故國梅花歸夢。愁損綠羅裙。爲問暗香開豔也。相思萬點付啼痕。算翠屏應是。兩眉餘恨倚黃昏。

岳飛

滿江紅

怒髮衝冠。憑闌處、瀟瀟雨歇。擡望眼、仰天長嘯。壯懷激烈。三十功名塵與土。八千里路雲和月。莫等閒白了少年頭。空悲切。靖康恥、猶未雪。臣子憾。何時滅。駕長車踏破賀蘭山缺。壯志飢餐胡虜肉。笑談渴飲匈奴血。待從頭收拾舊山河。朝天闕。

張孝祥

念奴嬌 過洞庭

六一

洞庭青草。近中秋。更無一點風色。玉界瓊田三萬頃。著我扁舟一葉。素月分輝。明河共影。表裡俱澄澈。悠然心會。妙處難與君說。應念嶺表經年。孤光自照。肝膽皆冰雪。短鬢蕭疏襟袖冷。穩泛滄溟空闊。盡吸西江。細斟北斗。萬象爲賓客。叩舷獨嘯。不知今夕何夕。

六州歌頭

長淮望斷。關塞莽然平。征塵暗。霜風勁。悄邊聲。黯消凝。追想當年事。殆天數。非人力。洙泗上。絃歌地。亦殫腥。隔水蘄鄉。落日牛羊下。區脫縱橫。看名王宵獵。騎火一川明。笳鼓悲鳴。遣人驚。念腰閒箭。匣中劍。空埃蠹。竟何成。時易失。心徒壯。歲將零。渺神京。干羽方懷遠。靜烽燧。且休兵。冠蓋使。紛馳鶩。若爲情。聞道中原。遺老常

南望。翠葆霓旌。使行人到此。忠憤氣填膺。有淚如傾。

韓元吉

好事近

凝碧舊池頭。一聽管絃淒切。多少梨園聲在。總不堪華髮。杏花無處避春愁。也傍野烟發。惟有御溝聲斷。似知人嗚咽。

六州歌頭

東風著意。先上小桃枝。紅粉膩。嬌如醉。倚朱扉。記年時。隱映新妝面。臨水岸。春將半。雲日暖。斜橋轉。夾城西。草軟莎平。跋馬垂楊渡。玉勒爭嘶。認蛾眉凝笑。臉薄拂燕脂。繡戶曾窺。恨依依。共攜手處。香如霧。紅隨步。怨春遲。消瘦損。憑誰問。只花知。淚空垂。舊日堂前

燕。和煙雨。又雙飛。人自老。春長好。夢佳期。前度劉郎。幾許風流地。花也應悲。但茫茫暮靄。目斷武陵溪。往事難追。

袁去華

瑞鶴仙

郊原初過雨。見數葉零亂。風定猶舞。斜陽挂深樹。映濃愁淺黛。遙山眉嫵。來時舊路。尙巖花嬌黃半吐。到而今惟有。溪邊流水。見人如故。無語。郵亭深靜。下馬還尋。舊曾題處。無聊倦旅。傷離恨。最愁苦。縱收香藏鏡。他年重到。人面桃花在否。念沈沈小閣幽窗。有時夢去。

劍器近

夜來雨。賴借得東風吹住。海棠正妖饒處。且留取。悄庭戶。試細聽鶯啼。

燕語。分明共人愁緒。怕春去。佳樹。翠陰初轉午。重簾未捲。乍睡起。寂寞看風絮。偷彈清淚寄煙波。見江頭故人。爲言憔悴如許。彩牋無數。去卻寒暄。到了渾無定據。斷腸落日千山暮。

安公子

鶯柳千絲縷。嫩黃勻徧鴉啼處。寒人羅衣春尙淺。過一番風雨。問燕子來時。綠水橋邊路。曾畫樓見箇人人否。料靜掩雲窗。塵滿哀絃危柱。庾信愁如許。爲誰都著眉端聚。獨立東風彈淚眼。寄煙波東去。念永晝。春閒人倦如何度。閒傍枕。百轉黃鸝語。喚覺來厭厭殘照。依然花塢。

陸 滋

瑞鶴仙

臉霞紅印枕。睡覺來。冠兒還是不整。屏閒麝煤冷。但眉峰壓翠。淚珠彈粉。堂深畫永燕交飛。風簾露井。恨無人說與相思。近日帶圍寬盡。重省。殘鐙未幌。淡月紗窗。那時風景。陽臺路迥。雲雨夢便無準。待歸來。先指花梢教看。欲把心期細問。問因循過了青春。怎生意穩。

陸游

漁家傲

東望山陰何處是。往來一萬三千里。寫得家書空滿紙。流清淚。書回已是明年事。寄語紅橋橋下水。扁舟何日尋兄弟。行遍天涯真老矣。愁無寐。鬢絲幾縷茶烟裏。

定風波

進賢道上見梅贈王伯詩

最帽垂鞭送客回。小橋流水一枝梅。衰病逢春都不記。誰謂。幽香卻解逐人來。安得身閒頻置酒。攜手。與君看到十分開。少壯相從今雪鬢。因甚。流年羈恨兩相催。

徐 照

阮 鵬 歸

綠楊庭戶靜沈沈。楊花吹滿襟。晚來閒向水邊尋。驚飛雙浴禽。分別後。重登臨。暮寒天氣陰。妾心移得在君心。方知人恨深。

陳 亮

水 龍 吟

鬧花深處樓臺。畫簾半捲東風軟。春歸翠陌。平莎茸嫩。垂楊金淺。遲日
催花。淡雲閣雨。輕寒輕暖。恨芳菲世界。游人未賞。都付與鶯和燕。
寂寞憑高念遠。向南樓一聲歸雁。金釵鬪草。青絲勒馬。風流雲散。羅綬
分香。翠綃封淚。幾多幽怨。正銷魂又是。疏烟淡月。子規聲斷。

范成大

憶秦娥

樓陰缺。闌干影臥東廂月。東廂月。一天風露。杏花如雪。隔烟催漏金
蚪咽。羅幃慘淡鐙花結。鐙花結。片時春夢。江南天濶。

醉落魄

棲鳥飛絕。絳河綠霧星明滅。燒香曳屐眠清樾。花影吹笙。滿地淡黃月。

好風碎竹聲如雪。昭華三弄臨風咽。鬢絲撩亂綸巾折。涼滿北窗。休共軟紅說。

霜天曉角

晚晴風歇。一夜春威折。脉脉花疏天淡。雲來去。數枝雪。勝絕。愁亦絕。此情誰共說。惟有兩行低雁。知人倚。畫樓月。

眼兒媚

酣酣日脚紫烟浮。妍暖試輕裘。困人天氣。醉人花底。午夢扶頭。春慵恰似春塘水。一片鵝紋愁。溶溶洩洩。東風無力。欲皺還休。

蔡幼學

好事近

日日惜春殘。春去更無明日。擬把醉同春住。又醒來岑寂。明年不怕不逢春。嬌春怕無力。待向燈前休睡。與留連今夕。

辛 棄 疾

賀 新 郎 別茂嘉十二弟

綠樹聽鶉鴉。更那堪鷓鴣聲住。杜鵑聲切。啼到春歸無啼處。苦恨芳菲都歇。算未抵人閒離別。馬上琵琶關塞黑。更長門翠輦辭金闕。看燕燕。送歸妾。將軍百戰身名裂。向河梁回頭萬里。故人長絕。易水蕭蕭西風冷。滿坐衣冠似雪。正壯士悲歌未徹。啼鳥還知如許恨。料不啼清淚長啼血。誰共我。醉明月。

鳳尾龍香撥。自開元霓裳曲罷。幾番風月。最苦潯陽江頭路。畫舸亭々待發。記出塞黃雲堆雪。馬上離愁三萬里。望昭陽宮殿孤鴻沒。絲解語。恨難說。遼陽驛使音塵絕。瑣窗寒輕攏慢撚。淚珠盈睫。推手含情還卻手。一抹梁州哀徹。千古事雲飛烟滅。賀老定場無消息。想沈香亭北繁華歇。彈到此。爲嗚咽。

水龍吟

楚天千里清秋。水隨天去秋無際。遙岑遠目。獻愁供恨。玉簪螺髻。落日樓頭。斷鴻聲裏。江南游子。把吳鈞看了。闌干拍遍。無人會。登臨意。休說鱸魚堪膾。儘西風季鷹歸未。求田問舍。怕應羞見。劉郎才氣。可惜流年。憂愁風雨。樹猶如此。倩何人喚取。紅巾翠袖。搵英雄淚。

又 過南劍雙溪樓

舉頭西北浮雲。倚天萬里須長劍。人言此地。夜深長見。斗牛光燄。我覺山高。潭空水冷。月明星淡。待然犀下看。凭闌卻怕。風雷怒。魚龍慘。峽束蒼江對起。過危樓欲飛還歛。元龍老矣。不妨高臥。冰壺涼簟。千古興亡。百年悲笑。一時登覽。問何人又卸。片帆沙岸。繫斜陽纜。

模魚兒

漁熙已亥自湖北漕移湖南同官王正之置酒小山亭爲賦

更能消幾番風雨。愔愔春又歸去。惜春長怕花開早。何況落紅無數。春且住。見說道。天涯芳草無歸路。怨春不語。算只有殷勤。畫檐蛛網。盡日惹飛絮。長門事。準擬佳期又誤。娥眉曾有人妬。千金縱買相如賦。脈脈此情誰訴。君莫舞。君不見。玉環飛燕皆塵土。閒愁最苦。休去倚危欄。斜陽正在。煙柳斷腸處。

水遇

樂 京口北固亭懷古

千古江山。英雄無覓。孫仲謀處。舞榭歌臺。風流總被。雨打風吹去。斜陽草樹。尋常巷陌。人道寄奴曾住。想當年金戈鐵馬。氣吞萬里如虎。元嘉草草。封狼居胥。贏得倉皇北顧。四十三年。望中猶記。烽火揚州路。可堪回首。佛狸祠下。一片神鴉社鼓。憑誰問。廉頗老矣。尙能飯否。

菩薩蠻 書江西造口壁

揆孤臺下清江水。中間多少行人淚。西北是長安。可憐無數山。青山遮不住。畢竟東流去。江晚正愁余。山深聞鷓鴣。

鷓鴣 天 鵝湖歸病起作

攪盡溪堂冷欲秋。斷雲依水晚來收。紅蓮裙倚渾如醉。白鳥無言定自愁。書咄咄。且休休。一邱一壑也風流。不知筋力衰多少。但覺新來懶上樓。

祝英臺近

寶釵分。桃葉渡。烟柳暗南浦。怕上層樓。十日九風雨。斷腸片片飛紅。都無人管。倩誰勸流鶯聲住。鬢邊覩。應把花卜歸期。纔簪又重數。羅帳燈昏。嗚咽夢中語。是他春帶愁來。春歸何處。卻不解帶將愁去。

青玉案 元夕

東風夜放花千樹。更吹落星如雨。寶馬雕車香滿路。鳳簫聲動。玉壺光轉。一夜魚龍舞。蛾兒雪柳黃金縷。笑語盈盈暗香去。衆裏尋他千百度。驀然回首。那人却在。燈火闌珊處。

木蘭花慢 滁州送范倅

老來情味減。對別酒。怯流年。况屈指中秋。十分好月。不照人圓。無情水都不管。共西風。只管送歸船。秋晚蒹蘆江上。夜深兒女燈前。征衫。便好去朝衣。玉殿正思賢。想夜半承明。留教視草。卻遣籌邊。長安故人

問我道愁腸殢酒只依然。目斷秋霄落雁。醉來時響空弦。

漢宮春 立春

春已歸來。看美人頭上。裊裊春幡。無端風雨。未肯收盡餘寒。年時燕子。料今宵夢到西園。渾未辦。黃柑薦酒。更傳青韭堆盤。却笑東風從此。便薰梅染柳。更沒些閒。閒時又來鏡裏。轉變朱顏。清愁不斷。問何人會解連環。生怕見花開花落。朝來寒雁先還。

八聲甘州

夜讀李廣傳不能寐因念晁楚老楊民瞻約同居山間戲用李廣事以寄之

故將軍飲罷夜歸來。長亭解雕鞍。恨灞陵醉尉。匆匆未識。桃李無言。射虎山橫一騎。裂石響驚弦。落魄封侯事。歲晚田園。誰向桑麻杜曲。要短衣匹馬。移住南山。看風流慷慨。談笑過殘年。漢開邊功名萬里。甚當時健者也曾閒。紗窗外。斜風細雨。一陣春寒。

水龍吟 題雨巖巖類今所畫觀音普陀巖中有泉飛出如風雨聲

普陀大士。虛空翠巖。誰記飛來處。蜂房萬點。似穿如碍。玲瓏窗戶。石髓千年。已垂未落。嶙峋冰柱。有怒濤聲遠。落花香在。人疑是。桃源路。又說春雷鼻息。是臥龍。鬱環如許。不然應是。洞庭張樂。湘靈來去。我意長松。倒生陰壑。細吟風雨。竟茫茫未曉。只應白髮。是開山祖。

賀新郎

邑中園亭僕皆爲賦此詞一日獨坐停雲水聲山色競來相娛意溪山欲接例者遂作數語庶幾彷彿淵明思親友之意云

甚矣吾衰矣。悵平生交游零落。只今餘幾。白髮空垂三千丈。一笑人間萬事。問何物能令公喜。我見青山多嫵媚。料青山見我應如是。情與貌。略相似。一尊搔首東窗裏。想淵明停雲詩就。此時風味。江左沈酣求名者。豈識濁醪妙理。回首叫雲飛風起。不恨古人吾不見。恨古人不見吾狂耳。知我者。二三子。

滿江紅

風捲庭梧。黃葉墜。新涼如洗。一笑折秋英同賞。弄香按藥。天遠難窮休
久望。樓高欲下還重倚。拚一襟寂寞淚彈秋。無人會。今古恨。沉荒壘。
悲歡事。隨流水。想登樓青鬢。未堪憔悴。極目烟橫山數點。孤舟月落人
千里。對嬋娟。從此話離愁。金尊裏。

破陣子

爲陳同甫賦壯詞

醉裏挑燈看劍。夢回吹角連營。八百里分麾下炙。五十絃翻塞外聲。沙場
秋點兵。馬作的盧飛快。弓如霹靂弦驚。了却君王天下事。贏得生前身
後名。可憐白髮生。

南鄉子

何處望神州。滿眼風光北固樓。千古興亡多少事。悠悠。不盡長江滾滾

流。年少萬兜鍪。坐斷東南戰未休。天下英雄誰敵手。曹劉。生子當如孫仲謀。

清平樂

遶牀飢鼠。蝙蝠翻鏡舞。屋上松風吹急雨。破紙窸聞自語。平生塞北江南。歸來華髮蒼顏。布被秋宵夢覺。眼前萬里江山。

浪淘沙

山寺夜半聞鐘

身世酒杯中。萬事皆空。古來三五箇英雄。雨打風吹何處是。漢殿秦宮。夢入少年叢。歌舞匆匆。老僧夜半誤鳴鐘。驚起西窗眠不得。捲地西風。

感皇恩

讀莊子聞朱晦庵卽世

案上數編書。非莊卽老。會說忘言始知道。萬言千句。不自能忘堪笑。今朝梅雨霽。青天好。一壑一邱。輕衫短帽。白髮多時故人少。子雲何

在。應有玄經遺草。江河流日夜。何時了。

生查子

去年燕子來。繡戶深深處。花暹得泥歸。都把琴書污。今年燕子來。誰聽呢喃語。不見捲簾人。一陣黃昏雨。

姜夔

小重山令 賦潭州紅梅

人繞湘皋月墜時。斜橫花樹小。浸愁漪。一春幽事有誰知。東風冷。香遠茜裙歸。鷗去昔遊非。遙憐花可可。夢依依。九疑雲杳斷魂啼。相思血。都化綠筠枝。

江梅引 丙辰之冬予留梁谿將詣淮而不得因夢思以述志

人間離別易多時。見梅枝。忽相思。幾度小窗幽夢，手同携。今夜夢中無覓處。漫裴回。寒侵被。尙未知。溼紅恨墨淺封題。寶箏空。無雁飛。俊游巷陌。算空有古木斜暉。舊約扁舟已成非。歌罷淮南春草賦。又萋萋。漂零客。淚滿衣。

點絳脣 丁未冬過吳松作

燕雁無心。太湖西畔隨雲去。數峯清苦。商略黃昏雨。第四橋邊。擬共天隨住。今何許。凭闌懷古。殘柳參差舞。

鷓鴣天 元夕有所夢

肥水東流無盡期。當初不合種相思。夢中未比丹青見。暗裏忽驚山鳥啼。春未綠。鬢先絲。人閒別久不成悲。誰教歲歲紅蓮夜。兩處沈吟各自知。

杏花天影 丙午之冬發汴口丁未正月二日道金陵北望淮楚風日清淑小舟掛席嘗與波上

綠絲低拂鴛鴦浦。想桃葉當時喚渡。又將愁眼與春風。待去倚蘭橈。更少駐。金陵路。鶯啼燕舞。算潮水知人最苦。滿汀芳草不成歸。日暮更移舟。向甚處。

訴衷情 端午宿合路

石榴一樹浸溪紅。零落小橋東。五日淒涼心事。山雨打船篷。語世味。

楚人弓。莫冲冲。白頭行客。不採蘋花。孤負薰風。

慶宮春

紹熙辛亥除夕予別石湖歸吳興雪後夜過垂虹嘗賦詩云笠澤茫茫雁影微玉峰重覺護去衣長橋寂寞春寒夜只有詩人一舸歸後五年冬復與俞商卿張平甫銘

朴翁自封禺同載詣梁谿道經吳松山寒天迥雪浪四合中夕相呼步垂虹星斗下垂錯雜漁火朝吹瀟瀟卮酒不能支朴翁以衾自纏猶相與行吟因賦此闕蓋過句

塗藥乃定朴翁答予無益然意所耽不能自己也平甫商卿朴翁皆工於詩所出奇詭予亦強追逐之此行既歸各得五下餘解

雙槳蕩波。一蓑松雨。暮愁漸滿空濶。呼我盟鷗。翩翩欲下。背人還過木末。那回歸去。蕩雲雪孤舟夜發。傷心重見。依約眉山。黛痕低壓。采

香逕裏春寒。老子婆娑。白歌誰答。垂虹西望。飄然引去。此興平生難

遏。酒醒波遠。正凝想明璫素襪。如今安在。唯有闌干。伴人一霎。

齊天樂

丙辰歲與張功父會飲張達可之堂聞屋壁間蟋蟀有聲功甫約予同賦以授歌者功甫先成詞甚美予徘徊茉莉花間仰見秋月頓起幽思尋亦得此蟋蟀中都呼爲

促織善鬪好事者或以三二十萬錢致一枚鏤象齒爲樓觀以貯之

庾郎先自吟愁賦。淒淒更聞私語。露濕銅鋪。苔侵石井。都是曾聽伊處。

哀音似訴。正思婦無眠。起尋機杼。曲曲屏山。夜涼獨自甚情緒。西窗

又吹暗雨。爲誰頻斷續。相和砧杵。候館吟秋。離宮弔月。別有傷心無

數。鬪詩謾與。笑籬落呼鏡。世間兒女。寫人琴絲。一聲聲更苦。

一萼紅

丙午人日子客長沙別駕之觀政堂堂上曲沼沼西負古垣有虛橋幽篁一逕深曲穿逕而南官梅數十株如椒如菽或紅破白露枝影扶疏着屐蒼苔細石閒野興橫

生亟命駕登定王臺亂湘流入麓山湘雲低昂湘波容與興盡悲來醉吟成調

古城陰。有官梅幾許。紅萼未宜簪。池面冰膠。牆腰雪老。雲意還又沈

沈。翠藤共閒穿徑竹。漸笑語驚起臥沙禽。野老林泉。故王臺榭。呼喚登臨。南去北來何事。蕩湘雲楚水。目極傷心。朱戶黏雞。金盤簇燕。空歎時序侵尋。記曾共西樓雅集。想垂楊還裊萬絲金。待得歸鞍到時。只怕春深。

念奴嬌

予客武陵湖北憲治在焉古城野水喬木參天予與二三友日蕩舟其間薄荷花而飲意象幽閑不類人境秋水且瀾荷葉出地尋丈因列坐其下不見日清風徐來綠雲自動閒於疏處窺見遊人畫舫亦一樂也榻來吳興數得相羊荷花中又夜泛西湖光景奇絕故以此句寫之

闌紅一舸。記來時常與鴛鴦爲侶。三十六陂人未到。水佩風裳無數。翠葉吹涼。玉容銷酒。更灑菰蒲雨。嫣然搖動。冷香飛上詩句。日暮青蓋亭亭。情人不見。爭忍凌波去。只恐舞衣寒易落。愁入西風南浦。高柳垂陰。老魚吹浪。留我花間住。田田多少。幾回沙際歸路。

眉
嫵
戲
仲
達

看垂楊連苑。杜若侵沙。愁損未歸眼。信馬青樓去。重簾下。娉婷人妙飛燕。翠尊共款。聽艷歌郎意先感。便携手月地雲階裏。愛良夜微暖。無限風流疏散。有暗藏弓履。偷寄香翰。明日聞津鼓。湘江上。催人還解春纜。亂紅萬點。悵斷魂煙水遙遠。又爭似相携。乘一舸。鎮長見。

月下笛

與客携壺。梅花過了。夜來風雨。幽禽自語。啄香心。度牆去。春衣多是柔荑剪。尙沾惹殘茸半縷。悵玉鈿似掃。朱門深閉。再見無路。凝竚。會游處。但繫馬垂楊。認郎鸚鵡。揚州夢覺。彩雲飛過何許。多情須倩梁上燕。問吟袖弓腰在否。怎知道。誤了人。年少自恁虛度。

霓裳中序第一

丙午歲留長沙登祝融因得其祠神之曲曰黃帝鹽蘇合香又於樂工故書中得商調霓裳曲十八闋皆虛譜無辭按沈氏樂律霓裳道調此乃商調樂天詩云散序六闋此詩兩闋未自孰是然音節固雅不類今曲予不暇詳作中序一闋傳於世予方竊道感此古音不自知其商之怨抑也

亭臯正望極。亂落江蓮歸未得。多病卻無氣力。況紈扇漸疏。羅衣初索。
流光過隙。歎杏梁雙燕如客。人何在。一簾淡月。彷彿照顏色。幽寂。
亂蛩吟壁。動庾信清愁似織。沈思年少浪跡。笛裏關山。柳下坊陌。墜紅
無信息。漫暗水涓涓溜碧。漂零久。而今何意。醉臥酒壚側。

法曲獻仙音

張彥功官舍在鐵冶嶺上卽昔之教坊使宅高齋下瞰湖山光景奇絕予數過之爲賦此

虛閣籠寒。小簾通月。暮色偏憐高處。樹隔離宮。水平馳道。湖山盡入尊
俎。奈楚客淹留久。砧聲帶愁去。屢回顧。過秋風未成歸計。誰念我。
重見冷楓紅舞。喚起淡粧人。問逋仙今在何許。象筆鸞箋。甚而今不道秀
句。怕平生幽恨。化作沙邊煙雨。

琵琶

仙

吳都賦云戶藏婢浦家具畫船唯吳興爲然春遊之盛西湖未能過也已酉歲予與蕭時父載酒南郭感遇成歌

雙槳來時。有人似舊曲桃根桃葉。歌扇輕約飛花。蛾眉正奇絕。春漸遠。

汀洲自綠。更添了幾聲啼鴉。十里揚州。三生杜牧。前事休說。又還是。宮燭分煙。奈愁裏、息息換時節。多把一襟芳思，與空階榆莢，千萬縷藏鴉細柳。爲玉尊起舞回雪。想見西出陽關。故人初別。

玲瓏四犯 越中歲暮聞簫鼓感懷

疊鼓夜寒。垂鐙春淺。匆匆時事如許。倦游歡意少。俯仰悲今古。江淹又吟恨賦。記當時、送君南浦。萬里乾坤。百年身世。惟有此情苦。揚州柳垂官路。有輕盈換馬。端正窺戶。酒醒明月下。夢逐潮聲去。文章信美知何用。謾贏得天涯羈旅。教說與春來。要尋花伴侶。

側犯 詠芍藥

恨春易去。甚春卻向揚州住。微雨。正繭栗梢頭弄詩句。紅橋二十四。總是行雲處。無語。漸半脫宮衣笑相顧。金壺細葉。千朵圍歌舞。誰念我

鬢成絲。來此共尊俎。後日西園。綠陰無數。寂寞劉郎。自修花譜。

水龍吟

黃慶長夜泛鑑湖有懷歸之曲課予和之

夜深客子移舟處。兩兩沙禽驚起。紅衣人漿。青鏡搖浪。微涼意思。把酒臨風。不思歸去。有如此水。況茂陵游倦。長干望久。芳心事。簫聲裡。屈指歸期尙未。鵲南飛有人應喜。畫閣桂子。留香小待。提携影底。我已情多。十年幽夢。略曾如此。甚謝郎也恨飄零。解道月明千里。

探春慢

予自孩幼從先人官於古汭女嬰因嫁焉中去復來幾二十年豈惟姊弟之愛汭之父老兒子亦莫不于愛也丙午冬千巖老人約予過若雲歲晚乘濤載雪而下願念依依殆不能去作此曲別鄭次真辛克清姚剛中諸君

衰草愁烟。亂鴉送日。風沙回旋平野。拂雪金鞭。欺寒茸帽。還記章臺走馬。誰念漂零久。謾贏得幽懷難寫。故人清沔相逢。小窗閒共情話。長恨離多會少。重訪問竹西。珠淚盈把。雁磧波平。漁汀人散。老去不堪游

冷。無奈碧溪月。又喚我扁舟東下。甚日歸來。梅花零落清夜。

八 歸 湘中送胡德華

芳蓮塵粉。疏桐吹綠。庭院暗雨乍歇。無端抱影銷魂處。還見篠簷燈暗。蘇階葢切。送客重尋西去路。問水面琵琶誰撥。最可惜。一片江山。總付與啼鴉。長恨相從未款。而今何事。又對西風離別。渚寒烟淡。棹移人遠。縹緲行舟如葉。想文君望久。倚竹愁生步羅襪。歸來後。翠尊雙飲。下了珠簾。玲瓏閑看月。

解 連 環

玉鞭重倚。却沈吟未上。又繫離思。爲大喬能撥春風。小喬妙移箏雁啼秋水。柳怯雲鬆。更何必十分梳洗。道郎携羽扇。那日隔簾。半面曾記。西窗夜涼雨霽。歡幽歡未足。何事輕棄。問後約。空指舊薇草。如此溪山。

甚時重至。水驛燈昏。又見在曲屏近底。念惟有夜來皓月。照伊自睡。

摸魚兒

辛亥秋期子寓合肥小雨初霽偃卧窗下心事悠然起與趙君猷露坐月飲戲吟此曲蓋欲一洗錮合金釵之塵他日野處見之甚爲子擊節也

向秋來漸疏班扇。雨聲時過金井。堂虛已放新涼入。湘竹最宜敲枕。閒記省。又還是斜河舊約今再整。天風夜冷。自織錦人歸。乘槎客去。此意有誰領。空贏得。今古三星爛爛。銀波相望千頃。柳州老矣猶兒戲。瓜果爲伊三請。雲路迴。漫說道年年野鵲曾並影。無人與問。但濁酒相呼。疏簾自捲。微月照清飲。

揚州漫

淳熙丙申至日余過維揚夜雪初霽齊麥彌望入其城則四顧蕭條寒水自碧暮色漸起戍角悲吟予懷怆然感慨今昔因自度此曲千巖老人以爲有黍離之悲也

淮左名都。竹西佳處。解鞍少駐初程。過春風十里。盡齊麥青青。白胡馬窺江去後。廢池喬木。猶厭言兵。漸黃昏。清角吹寒。都在空城。杜郎俊賞。算而今重到須驚。縱豆蔻詞工。青樓夢好。難賦深情。二十四橋仍

在。波心蕩冷月無聲。念橋邊紅藥。年年知爲誰生。

長亭怨慢

予頗喜自製曲初率意爲長短句然後協以律故前後闕多不同桓大司馬云昔年種柳依依漢南今石搖落悽愴江潭樹猶如此人何以堪此語予深愛之

漸吹盡枝頭香絮。是處人家。綠深門戶。遠浦縈回。暮帆零亂向何許。閱人多矣。誰得似長亭樹。樹若有情時。不會得青青如此。日暮。望高城不見。只見亂山無數。韋郎去也。怎忘却玉環分付。第一是早早歸來。怕紅夢無人爲主。算空有并刀。難剪離愁千縷。

淡黃柳

客居合肥南城赤欄橋之西巷陌淒涼與江左異惟柳色夾道依依可憐因度此曲以紓客懷

空城曉角。吹入垂楊陌。馬上單衣寒惻惻。看盡鶯黃嫩綠。都是江南舊相識。正岑寂。明朝又寒食。強携酒。小喬宅。怕梨花落盡成秋色。燕燕飛來。問春何在。唯有池塘自碧。

暗

香

辛亥之冬予載雪詣石湖止既月授簡索句且徵新聲作此兩曲石湖把玩不已使二妓肄習之音韻諧婉乃命之曰暗香疏影

舊時月色。算幾番照我。梅邊吹笛。喚起玉人。不管清寒與攀摘。何遜而今漸老。都忘却春風詞筆。但怪得竹外疏花。香冷入瑤席。江國。正寂寂。歎寄與路遙。夜雪初積。翠尊易泣。紅夢無言耿相憶。長記曾携手處。千樹壓西湖寒碧。又片片吹盡也。幾時見得。

疏影

苔枝綴玉。有翠禽小小。枝上同宿。客裡相逢。籬角黃昏。無言自倚修竹。昭君不慣胡沙遠。但暗憶江南江北。想佩環月夜歸來。化作此花幽獨。猶記深宮舊事。那人正睡裡。飛近蛾綠。莫似春風。不管盈盈。早與安排金屋。還教一片隨波去。又却怨玉龍哀曲。等恁時重覓幽香。已入小窗橫幅。

惜紅衣

吳興號水晶宮荷花盛麗陳簡齋云今年何以報君恩一路荷花相送到清墩亦可見矣丁未之夏予遊千巖數往來紅藕中自度此曲以無射宮歌之

簾枕邀涼。琴書換日。睡餘無力。細灑冰泉。并刀破甘碧。墻頭換酒誰問訊。城南詩客岑寂。高樹晚蟬。說西風消息。虹梁水陌。魚浪吹香。紅衣半狼籍。維舟試望。故國眇天北。可惜柳邊沙外。不共美人游歷。問甚時同賦。三十六陂秋色。

角

招

甲寅春予與俞商卿燕遊西湖觀梅於孤山之西邨玉雪照映畝香薄人已而商卿歸吳興予獨來則山橫春煙新柳被水遊人容與飛花中悵然有懷作此寄之商卿善歌聲稍以儒雅飾予每自度曲吟詞蕭商卿輒歌而和之極有山林縹緲之思今予譙憂商卿一行作吏殆無復此樂矣

爲春瘦。何堪更繞西湖。盡是垂柳。自看烟外岫。記得與君。湖上携手。君歸未久。早亂落香紅千畝。一葉凌波縹緲。過三十六離宮。遣游人回首。猶有。畫船障袖。青樓倚扇。相映人爭秀。翠翹光欲溜。愛着宮黃。而今時候。傷春似舊。蕩一點春心如酒。寫入吳絲白奏。問誰識曲中心。花前友。

徵

招越中山東詞子繫上十四興錢清開吳道清瞻越人送後舟卷澤方成府師行歌
徐徐更之如他階上無動搖突兀勢以故得盡情騁望予欲家焉而未得作徵招
以寄興

潮回却過西陵浦。扁舟僅容居士。去得幾何時。黍離離如此。客途今倦矣。慢贏得一襟詩思。記憶江南。落帆沙際。此行還是。迤邐剡中山。重相見。依依故人情味。似怨不來遊。擁愁鬢十二。一丘聊復爾。也孤負幼與高志。水濱晚。漠漠搖烟。奈未成歸計。

淒涼

犯合肥卷陌皆種柳秋風夕起騷騷然予客居闔戶時聞馬嘶出城四顧則荒煙野草
不勝淒黯乃著此辭

綠楊巷陌秋風起。邊城一片離索。馬嘶漸遠。人歸甚處。戍樓吹角。情懷正惡。更衰草寒煙淡薄。似當時將軍部曲。迤邐度沙漠。追念西湖上。小舫携歌。晚花行樂。舊游在否。想如今翠凋紅落。漫寫羊裙。等新雁來時繫著。怕匆匆不肯寄與。悞後約。

翠樓吟

淳熙丙午冬武昌安遠樓成與劉去非諸友落之度曲見志予去武昌十年故人泊舟鸚鵡洲者聞小姬歌此詞問之頗能道其事還吳爲予言之興懷昔游且傷今之離索也

月冷龍沙。塵清虎落。今年漢輔初賜。新翻胡部曲。聽氈幕元戎歌吹。層樓高峙。看檻曲縈紅。簷牙飛翠。人姝麗。粉香吹下。夜寒風細。此地宜有詞仙。擁素雲黃鶴。與君遊戲。玉梯凝望久。歎芳草淒淒千里。

天涯情味。仗酒祓清愁。花消英氣。西山外。晚來還捲。一簾秋霽。

湘月

長溪楊聲伯典長沙機擢居瀨湘江窗間所見如燕公郭熙圖畫卧起幽適丙午七月既望聲伯約予與趙景魯景望聲和父裕父時父恭父大舟浮湘放乎中流山水空寒煙月交映淒然其爲秋也坐客皆小冠練服或彈琴或浩歌或自酌或援筆搜句子度此曲即念奴嬌之兩指聲也於雙調中吹之兩指亦謂之過腔見晁無咎集凡能吹竹者便能過腔也

五湖舊約。問經年底事。長負清景。暝入西山漸喚我。一葉夷猶乘興。倦網多收。歸禽時度。月上汀洲冷。中流容與。畫橈不點清鏡。誰解喚起

湘靈。烟鬢霧鬢。理哀絃鴻陣。玉塵談玄歎坐客。多少風流名勝。暗柳蕭蕭。飛星冉冉。夜久知秋信。鱸魚應好。舊家樂事誰省。

滿江紅

滿江紅舊詞用仄韻多不協律如末句云無心撲三字歌者將心字融入去聲方諧音律予欲以平韻爲之久不能成因汎巢湖聞遠岸簫鼓聲問之舟師云居人爲此湖神姥壽也予因祝曰得一席風徑至居巢當以平韻滿江紅爲迎送神曲言訖風與箏俱駛頃刻而成末句云聞佩環則協律矣書以綠箋沈於白浪幸亥正月晦也是歲六月復過祠下因刻之柱間有客來自居巢云上人祠姥輒能歌此詞按曹操至濡須口孫權遣操書曰春水方生公宜速去操曰孫權不欺孤乃徹軍還濡須口與東關相近江湖水之所出入予意春水方生必有司之者故歸其功於姥云

仙姥來時。正一望千頃翠瀾。旌旗共亂雲俱下。依約前山。命駕群龍金作輓。相從諸娣玉爲冠。向夜深風定悄無人。聞佩環。神奇處。君試看。奠淮右。阻江南。遣六丁雷電。別守東關。却笑英雄無好手。一篙春水走曹瞞。又怎知人在小紅樓。簾影間。

踏莎行 自沔東來丁未元日至金陵江上感夢而作

燕燕輕盈。鶯鶯嬌軟。分明又向華胥見。夜長爭得薄情知。春初早被相思染。別後書辭。別時針線。離魂暗逐郎行遠。淮南皓月冷千山。冥冥歸去無人管。

章良能

小重山

柳暗花明春事深。小闌紅芍藥。已抽簪。雨餘風軟碎鳴禽。遲遲日。猶帶一分陰。往事莫沈吟。身閒時序好。且登臨。舊遊無處不堪尋。無尋處。惟有少年心。

劉過

唐 多 令

蘆葉滿汀洲。寒沙帶淺流。二十年重過南樓。柳下繫船猶未穩。能幾日。
又中秋。黃鶴斷磯頭。故人曾到不。舊江山渾是新愁。欲買桂花同載
酒。終不似。少年游。

嚴 仁

木 蘭 花

春風只在園西畔。薺菜花繁胡蝶亂。冰池晴綠照還空。香徑落紅吹已斷。
意長翻恨游絲短。盡日相思羅帶緩。寶奩如月不欺人。明日歸來君試看。

俞 國 寶

風入松

一春長費買花錢。日日醉湖邊。玉驄慣識西湖路。驕嘶過沽酒鑪前。紅杏香中簫鼓。綠楊影裏鞦韆。暖風十里麗人天。花壓鬢雲偏。畫船載取春歸去。餘情付湖水湖煙。明日重扶殘醉。來尋陌上花鈿。

張 鎡

滿庭芳 促織兒

月洗高梧。露溥幽草。寶釵樓外秋深。土花沿翠。螢火墜牆陰。靜聽寒聲斷續。微韻轉。淒咽悲沈。爭求侶。殷勤勸織。促破曉機心。兒時曾記得。呼燈灌穴。斂步隨音。任滿身花影。猶自追尋。攜向華堂戲鬪。亭臺小。籠巧妝金。今休說。從渠牀下。涼夜伴孤吟。

史達祖

雙雙燕詠燕

過春社了。度簾幕中閒。去年塵冷。差池欲住。試入舊巢相並。還相雕梁藻井。又軟語商量不定。飄然快拂花梢。翠尾分開紅影。芳徑。芹泥雨潤。愛貼地爭飛。競誇輕俊。紅樓歸晚。看足柳昏花暝。應自棲香正穩。便忘了天涯芳信。愁損翠黛雙蛾。日日畫欄獨凭。

綺羅香詠春雨

做冷欺花。將烟困柳。千里偷催春暮。盡日冥迷。愁裡欲飛還住。驚粉重。蝶宿西園。喜泥潤。燕歸南浦。最妨他佳約風流。鈿車不到杜陵路。沈沈江上望極。還被春潮晚急。難尋官渡。隱約遙峰。和淚謝娘眉嫵。臨斷岸新綠生時。是落紅帶愁流處。記當日。門掩梨花。剪鐙深夜語。

東風第一枝 春雪

巧沁蘭心。偷黏草甲。東風欲障新暖。漫疑碧瓦難留。信知暮寒較淺。行天入鏡。做弄出輕絲纖軟。料故園不捲重簾。誤了乍來雙燕。青未了。柳回白眼。紅欲斷。杏開素面。舊游憶著山陰。後盟遂妨上苑。寒鑪重煖。便放漫春衫鍼線。怕鳳鞮挑菜歸來。萬一灞橋相見。

喜遷鶯 元宵

月波凝滴。望玉壺天近。了無塵隔。翠眼圈花。冰絲織靨。黃道寶光相直。自憐詩酒瘦。難應接許多春色。最無賴。是隨香趁燭。曾伴狂客。蹤迹漫記憶。老了杜郎。忍聽東風笛。柳院鐙疏。梅廳雪在。誰與細傾春碧。舊情拘未定。猶自學當年游歷。怕萬一。誤玉人夜寒簾隙。

三姝媚

煙光搖縹瓦。望晴檐多風。柳花如灑。錦瑟橫牀。想淚痕塵影。鳳絃常下。倦出犀帷。頻夢見王孫驕馬。諱道相思。偷理綰裙。自驚腰衩。惆悵南樓遙夜。記翠箔張燈。枕前歌罷。又入銅駝。徧舊家門巷。首詢聲價。可惜東風。將恨與閒花俱謝。記取崔徽模樣。歸來暗寫。

玉胡蝶

晚雨未摧宮樹。可憐閒葉。猶抱涼蟬。短景歸秋。吟思又接愁邊。漏初長。夢魂難禁。人漸老。風月俱寒。想幽歡。土花庭甃。蟲網闌干。無端。啼蛄攪夜。恨隨團扇。苦近秋蓮。一笛當樓。謝娘懸淚立風前。故園晚強留詩酒。新雁遠不致寒暄。隔蒼煙。楚香羅袖。誰伴嬋娟。

劉克莊

木蘭花 戲林推

年年躍馬長安市。客舍似家家似寄。青錢換酒日無何。紅燭呼盧宵不寐。
易挑錦婦機中字。難得玉人心下事。男兒西北有神州。莫滴水西橋畔淚。

生查子 元夕戲陳敬叟

繁燈奪霽華。戲鼓侵明發。物色舊時同。情味中年別。淺畫鏡中眉。深
拜樓中月。人散市聲收。漸入愁時節。

賀新郎 端午

深院榴花吐。畫簾閒練衣紈扇。午風清暑。兒女紛紛誇結束。新樣釵符艾
虎。早已有游人觀渡。老大逢場慵作戲。任墮頭年少爭旗鼓。溪雨急。
浪花舞。靈均標致高如許。憶生平既紉蘭佩。更懷椒醑。誰信騷魂千載
後。波底垂涎角黍。又說是蛟饞龍怒。把似而今醒到了。料當年醉死差無

苦。聊一笑。弔千古。

又九日

湛湛長空黑。更那堪斜風細雨。亂愁如織。老眼平生空四海。賴有高樓百尺。看浩蕩千崖秋色。白髮書生神州淚。儘淒涼不向牛山滴。追往事。去無迹。少年自負凌雲筆。到而今春華落盡。滿懷蕭瑟。常恨世人新意少。愛說南朝狂客。把破帽年年拈出。若對黃花孤負酒。怕黃花也笑人岑寂。鴻北去。日西匿。

盧祖皋

江城子

畫樓簾幕捲新晴。掩銀屏。曉寒輕。墜粉飄香。日日喚愁生。暗數十年湖

上路能幾度。著妙婷。年華空白感飄零。擁春醒。對誰醒。天闊雲
閒。無處覓簫聲。載酒買花年少事。渾不似。舊心情。

宴清都

春訊飛瓊管。風日薄。度牆啼鳥聲亂。江城次第。笙歌翠合。綺羅香暖。
溶溶澗淥冰泮。醉夢裏年華暗換。料黛眉重鎖隋隄。芳心還動梁苑。新
來雁闕雲音。鸞分鑑影。無計重見。啼春細雨。籠愁淡月。恁時庭院。離
腸未語先斷。算猶有憑高望眼。更那堪衰草連天。飛梅弄晚。

潘 牯

南鄉子 題南劍州伎館

生怕倚闌干。閣下溪聲閣外山。惟有舊時山共水。依然。暮雨朝雲去不

還。應是躡飛鸞。月下時時整佩環。月又漸低霜又下。更闌。折得梅花獨自看。

吳文英

齊天樂

煙波桃葉西陵路。十年斷魂潮尾。古柳重攀。輕鷗聚別。陳迹危亭獨倚。涼颼乍起。渺煙橫飛帆。暮山橫翠。但有江花。共臨秋鏡照憔悴。華堂燭暗送客。眼波回盼處。芳豔流水。素骨凝冰。柔蔥蘸雪。猶憶分瓜深意。清尊未洗。夢不濕行雲。漫沾殘淚。可惜秋宵。亂蛩疏雨裏。

花

犯 郭希道送水仙索賦

小娉婷。清鉛素靨。蜂黃暗偷暈。翠翹敬鬢。昨夜冷中庭。月下相認。睡

濃更苦淒風緊。驚回心未穩。送曉色一壺葱蒨。纔知花夢準。湘娥化作此幽芳。凌波路古岸雲沙遺恨。臨砌影。寒香亂凍梅藏韻。熏鑪畔旋移傍枕。還又見玉人垂紺鬢。料喚賞清華池館。臺杯須滿引。

祝英臺近

春日客龜溪游廢園

采幽香。巡古苑。竹冷翠微路。鬪草溪根。沙印小蓮步。自憐雙鬢清霜。一年寒食。又身在雲山深處。晝間度。因甚天也慳春。輕陰便成雨。綠暗長亭。歸夢趁風絮。有情花影闌干。鶯聲門徑。解留我霎時凝竚。

風入松

聽風聽雨過清明。愁草瘞花銘。樓前綠暗分携路。一絲柳一寸柔情。料峭春寒中酒。交加曉夢啼鶯。西園日日掃林亭。依舊賞新晴。黃蜂頻撲鞦韆索。有當時纖手香凝。惆悵雙鴛不到。幽階一夜苔生。

惜黃花慢

次吳江小泊夜飲僧窗惜別邦人趙錫揚小妓伯尊連歌數闋皆清真詞酒盡已四鼓賦此詞錢尹梅津

送客吳臯。正試霜夜冷。楓落長橋。望天不盡。背城漸杳。離亭黯黯。恨水迢迢。翠香零落紅衣老。暮愁鎖殘柳眉梢。念瘦腰。沈郎舊日。曾繫蘭橈。仙人鳳咽瓊簫。悵斷魂送遠。九辯難招。醉鬟留盼。小窗剪燭。歌雲載恨。飛上銀霄。素秋不解隨船去。敗紅趁一葉寒濤。夢翠翹。怨鴻料過南譙。

高陽臺落梅

宮粉雕痕。仙雲墮影。無人野水荒灣。古石埋香。金沙鎖骨連環。南樓不恨吹橫笛。恨曉風千里關山。半飄零。庭上黃昏。月冷闌干。壽陽空理愁鸞。問誰調玉髓。暗補香瘢。細雨歸鴻。孤山無限清寒。離魂難倩招清些。夢縞衣解佩溪邊。最愁人。啼鳥晴明。葉底清圓。

八聲甘州 靈巖陪庾幕諸公游

渺空烟四遠。是何年。青天墜長星。幻蒼崖雲樹。名娃金屋。殘霸宮城。箭
徑酸風射眼。膩水染花腥。時鞞雙鴛響。廊葉秋聲。宮裏吳王沈醉。倩
五湖倦客。獨釣醒醒。問蒼波無語。華髮奈山青。水滴空闌干高處。送亂
鴉斜日落漁汀。連呼酒。上琴臺去。秋與雲平。

夜游宮

人去西樓雁杳。叙別夢揚州一覺。雲淡星疏楚山曉。聽啼鳥。立河橋。話
未了。雨外蛩聲早。細織就霜絲多少。說與蕭娘未知道。向長安。對
秋鐙。幾人老。

宴清都 連理海棠

繡幄鴛鴦柱。紅情密。膩雲低護秦樹。芳根兼倚。花梢鈿合。錦屏人妬。

東風睡足交枝。正夢枕瑤釵燕股。障澹蠟滿照歡叢。菱蟾冷落差度。人
間萬感幽單。華清慣浴。春盎風露。連鬟並暖。同心共結。向承恩處。憑
誰爲歌長恨。暗殿鎖秋鐙夜語。叙舊期不負春盟。紅朝翠暮。

青玉案

新腔一曲雙金斗。正霜落。分柑手。已是紅窗人倦繡。春詞裁燭。夜香溫
被。怕減銀壺漏。吳天雁曉雲飛後。百感情懷頓疏酒。綵扇何時翻翠
袖。歌邊拚取。醉魂和夢。化作梅花瘦。

三姝媚 過都城舊居有感

湖山經醉慣。漬春衫。啼痕酒痕無限。又客長安。歎斷襟零袂。滄塵誰
浣。紫曲門荒。沿敗井風搖青蔓。對語東鄰。猶是曾巢。謝堂雙燕。春
夢人間須斷。但怪得當年。夢緣能短。繡屋秦箏。傍海棠偏愛夜深開宴。

舞歇歌沈。花未減紅顏先變。竚久河橋欲去。斜陽淚滿。

祝英臺近 除夜立春

翦紅情。裁綠意。花信上釵股。殘日東風。不放歲華去。有人添燭西窗。不眠侵曉。笑聲轉新年鶯語。舊樽俎。玉纖曾擘黃柑。柔香繫幽素。歸夢湖邊。還迷鏡中路。可憐千點吳霜。寒消不盡。又相對落梅如雨。

鷓鴣天 化度寺作

池上紅衣伴倚闌。棲鴉常帶夕陽還。殷雲度雨疏桐落。明月生涼寶扇閒。鄉夢窄。水天寬。小窗愁黛淡秋山。吳鴻好爲傳歸信。楊柳閨門屋數間。

惜黃花慢 賦 菊

粉靨金裳。映繡屏認得。舊日宮裳。翠微高處。故人帽底。一年最好。偏是重陽。避春只怕春不遠。傍幽逕偷理秋妝。殢醉鄉。寸心似剪。飄蕩愁

觴。潮颯笑入清霜。鬪萬花樣巧。深染蜂黃。露痕千點。自憐舊色。寒
泉半掬。百感幽香。雁聲不到東籬畔。滿城但風雨淒涼。最斷腸。夜深怨
蝶飛狂。

賀新郎 陪履齋先生滄浪看梅

喬木生雲氣。訪中興英雄陳迹。暗追前事。戰艦東風慳借便。夢斷神州故
里。旋小築吳宮閒地。華表月明歸夜鶴。歎當時花竹今如此。枝上露。
濺清淚。遨頭小簇行春隊。步蒼苔尋幽別墅。問梅開未。重唱梅邊新度
曲。催發寒梢凍蕊。此心與東君同意。後不如今今非昔。兩無言相對滄浪
水。懷此恨。寄殘醉。

唐多令

何處合成愁。離人心上秋。縱芭蕉不雨也颼颼。都道晚涼天氣好。有明

月。怕登樓。年事夢中休。花空煙水流。燕辭歸客尙淹留。垂柳不禁裙帶住。漫長是。繫行舟。

黃孝邁

湘春夜月

近清明。翠禽枝上消魂。可惜一片清歌。都付與黃昏。欲共柳花低訴。怕柳花輕薄。不解傷春。念楚鄉旅宿。柔情別緒。誰與溫存。空尊夜泣。青山不語。殘照當門。翠玉樓前。惟是有一波湘水。搖蕩湘雲。天長夢短。問甚時重見桃根。者次第。算人間沒箇。并刀剪斷。心上愁痕。

潘希白

大有九日

戲馬臺前。采花籬下。問歲華還是重九。恰歸來。南山翠色依舊。簾櫳昨夜聽風雨。都不似登臨時候。一片宋玉情懷。十分衛郎清瘦。紅萸佩。空對酒。砧杵動微寒。暗欺羅袖。秋已無多。早是敗荷衰柳。強整帽檐敲側。曾經向天涯搔首。幾回憶故國尊鱸。霜前雁後。

黃公紹

青玉案

年年社日停針線。怎忍見。雙飛燕。今日江城春已半。一身猶在，亂山深處，寂寞溪橋畔。春衫著破誰針線。點點行行淚痕滿。落日解鞍芳草岸。花無人戴，酒無人勸，睡也無人管。

李 演

賀 新 涼 多景樓落成

笛叫東風起。弄尊前楊花小扇。燕毛初紫。萬點淮峰孤角外。驚下斜楊似綺。又婉婉一番春意。歌舞相繆愁自猛。捲長波一洗人閒世。空熱我。醉時耳。綠蕪冷葉瓜州市。最憐予。洞簫聲盡。闌干獨倚。落落東南天一角。誰護山河半里。問人在玉關歸未。老矣青山鐙火客。撫佳期漫灑新亭淚。歌哽咽。事如水。

劉 辰 翁

蘭 陵 王 丙子送春

送春去。春去人閒無路。鞦韆外。芳草連天。誰遣風沙暗南浦。依依甚意。

緒。漫憶海門飛絮。亂鴉過。斗轉城荒。不見來時試燈處。春去誰最苦。
但箭雁沈邊。梁燕無主。杜鵑聲裏長門暮。想玉樹凋土。淚盤如露。咸陽
送客屢回顧。斜日未能度。春去。尙來否。正江令恨別。庾信愁賦。蘇
隄盡日風和雨。歎神游故國。花記前度。人生流落。願孺子。共夜語。

寶鼎現

紅妝春騎。踏月花影。竿旗穿市。望不盡樓臺歌舞。習習香塵蓮步底。簫
聲斷約彩鸞歸去。未怕金吾呵醉。甚輦路喧闐且止。聽得念奴歌起。父
老猶記宣和事。抱銅仙清淚如水。還轉盼沙河多麗。滉漾明光連邸第。簾
影凍散紅光成綺。月浸葡萄十里。看往來神仙才子。肯把菱花撲碎。腸
斷竹馬兒童。空見說三千樂指。等多時春不歸來。到春時欲睡。又說向燈
前擁髻。暗滴蛟珠墜。便當日親見霓裳。天上人間夢裏。

永遇樂

余自乙亥上元誦李易安永遇樂爲之涕下今年矣每聞此詞輒不自堪遂依其聲又託之易安自喻雖辭情不及而悲苦過之

璧月初晴。黛雲遠淡。春事誰主。禁苑嬌寒。湖隄倦暖。前度遽如許。香塵暗陌。華燈明晝。長是懶攜手去。誰知道斷煙禁夜。滿城似愁風雨。宣和舊日。臨安南渡。芳景猶自如故。緜帙流離。風鬟三五。能賦詞最苦。江南無路。鄜州今夜。此苦又誰知否。空相對殘釭無寐。滿邨社鼓。

摸魚兒

酒邊留同年徐雲屋

怎知他春歸何處。相逢且盡尊酒。少年嫋嫋天涯恨。長結西湖煙柳。休回首。但細雨鬪橋樵。憔悴人歸後。東風似舊。問前度桃花。劉郎能記。花復認郎否。君且住。草草留君剪韭。前宵正恁時候。深杯欲共歌聲滑。翻滢春衫半袖。空眉皺。看白髮尊前已似人人有。臨分把手。歎一笑論文。清狂顧曲。此會幾時又。

周 密

高 陽 臺 寄越中諸友

小雨分江。殘寒迷浦。春容淺入蕙葭。雪霽空城。燕歸何處人家。夢魂欲
渡蒼茫去。怕夢輕還被愁遮。感流年。夜汐東還。冷照西斜。淒淒望極
王孫草。認雲中煙樹。鷗外春沙。白髮青山。可憐相對蒼華。歸鴻自趁潮
回去。笑倦遊猶是天涯。問東風。先到垂楊。後到梅花。

法曲獻仙音 弔雪香亭梅

松雪飄寒。嶺雲吹凍。紅破數椒春淺。舞榭臺荒。浣妝池冷。淒涼市朝輕
換。歎花與人凋謝。依依歲華晚。共淒黯。問東風幾番吹夢。應慣識當
年翠屏金輦。一片古今愁。但廢綠平煙荒。無語銷魂。對斜陽。衰草淚
滿。又西風殘笛。低送幾聲春怨。

國香慢 賦子固凌波圖

玉潤金明。記曲屏小几。剪葉移根。經年汜人重見。瘦影娉伶。雨帶風襟。零落。步冷雲鷺筥吹春。相逢舊京洛。素靨塵緇。仙掌霜凝。國香流落恨。正冰銷翠薄。誰念遺簪。水空天遠。應念攀弟梅兄。渺渺魚波望極。五十絃愁滿湘雲。淒涼耿無語。夢入東風。雪盡江清。

花 犯 水仙花

楚江湄。湘娥再見。無言灑清淚。淡然春意。空獨倚東風。芳思誰寄。凌波路冷秋無際。香雲隨步起。漫記得漢宮仙掌。亭亭明月底。冰絃寫怨更多情。騷人恨枉賦。芳蘭幽芷。春思遠。誰歎賞國香風味。相將共歲寒伴侶。小窗靜沈香薰翠被。幽夢覺涓涓清露。一枝鐙影裏。

曲游春

唐詞謂上薄游苑中山賦詞甚佳余因文其韻蓋平時游藝至午後則盡入宴遊撰暮出歸橋小住而歸非習於游者不知也故中山咏游節余聞卻半湖春色之句

謂能道人之所未云

禁苑東風外。颺暖絲晴絮。春思如織。燕約鶯期。惱芳情偏在。翠深紅
隙。漠漠香塵隔。沸十里亂絃叢笛。看畫船盡入西冷。閒卻半湖春色。
柳陌。新烟凝碧。映簾底宮眉。堤上游勒。輕暝籠寒。怕梨雲夢冷。杏香
愁幕。歌管酬寒食。奈蝶怨良宵岑寂。正滿湖碎月搖花。怎生去得。

玉京秋

長安獨客又見西風素月丹楓淒然其爲秋也因調夾鍾羽一解

煙水闊。高林弄殘照。晚蜩淒切。碧砧度韻。銀牀飄葉。衣溼桐陰冷。
采涼花時賦秋雪。歎輕別。一襟幽事。砌蟲能說。客思吟商還怯。怨歌
長瓊壺暗缺。翠扇恩疏。紅衣香褪。翻成消歇。玉骨西風。恨最恨閒卻新
涼時節。楚簫咽。誰寄西樓淡月。

蔣捷

賀新郎

夢冷黃金屋。歎秦箏斜鴻陣裏。素絃塵撲。化作嬌鶯飛歸去。猶認紗窗舊
 綠。正過雨荆桃如菽。此恨難平君知否。似瓊臺湧起彈碁局。消瘦影。嫌
 明燭。鴛樓碎瀉東西玉。問芳踪何時再展。翠釵難卜。待把宮眉橫雲
 樣。描上生綃畫幅。怕不是新來妝束。綵扇紅牙今都在。恨無人解聽開元
 曲。空掩袖。倚寒竹。

女冠子元夕

蕙花香也。雪晴池館如畫。春風飛到。寶釵樓上。一片笙簫。琉璃光射。
 而今鐙漫挂。不是暗塵明月。那時元夜。況年來心懶意怯。羞與蛾兒爭
 耍。江城人悄初更打。問繁華誰解。再向天公借。剔殘紅燭。但夢裡隱

隱。鈿車羅帕。吳牋銀粉研。待把舊家風景。寫成閒話。笑綠鬢鄰女。倚窗猶唱。夕陽西下。

張 炎

高 陽 臺 西湖春感

接葉巢鶯。平波捲絮。斷橋斜日歸船。能幾番游。看花又是明年。東風且伴薔薇住。到薔薇春已堪憐。更淒然。萬綠西冷。一抹寒烟。當年燕子知何處。但苔深草曲。草暗斜川。見說新愁。如今也到鷗邊。無心再續笙歌夢。掩重門淺醉閑眠。莫開簾。怕見飛花。怕聽啼鶯。

解 連 環 孤 雁

楚江空晚。恨離群萬里。恍然驚散。自顧影却下寒塘。正沙淨草枯。水平

天遠。寫不成書。只寄得相思一點。料因循誤了。殘蟬擁雪。故人心眼。

誰憐旅愁荏苒。漫長門夜悄。錦箏彈怨。想伴侶猶宿蘆花。也曾念春前。去程應轉。暮雨相呼。怕鶯地玉關重見。未羞他雙燕歸來。畫簾半捲。

八聲甘州

辛卯歲沈堯道同余北歸各處杭越踰歲堯道來問寂寞語笑數日又復別去賦此曲並寄趙學府

記玉關踏雪事清游。寒氣脆貂裘。傍枯林古道。長河飲馬。此意悠悠。短夢依然江表。老淚灑西州。一字無題處。落葉都愁。載取白雲歸去。問誰留楚佩。弄影中洲。折蘆花贈遠。零落一身秋。向尋常野橋流水。待招來不是舊沙鷗。空懷感。有斜陽處。卻怕登樓。

疏

影詠荷葉

碧圓自潔。向淺洲遠浦。亭亭清絕。猶有遺簪。不展秋心。能捲幾多炎熱。鴛鴦密語同傾蓋。且莫與浣紗人說。恐怨歌忽斷花風。碎卻翠雲千疊。

回首當年漢舞。怕飛去漫皺。留仙裙摺。戀戀青衫。猶染枯香。還歎鬢
絲飄雪。盤心清露如鉛水。又一夜西風吹折。喜淨看匹練飛光。倒瀉半湖
明月。

月下

笛

孤游萬竹山中聞門落葉愁思黯然因動黍離之感時寓甬東積翠山舍

萬里孤雲。清游漸遠。故人何處。寒窗夢裏。猶記經行舊時路。連昌約略
無多柳。第一是難聽夜雨。漫驚回淒悄。相看燭影。擁衾無語。張緒。
歸何暮。半零落依依。斷橋鷗鷺。天涯倦旅。此時心事良苦。只愁重灑西
州淚。問杜曲人家在否。恐翠袖天寒。猶倚梅花那樹。

齊天樂

十年前事翻疑夢。重逢可憐俱老。水國春空。山城歲晚。無語相看一笑。
荷衣換了。恁京洛塵沙。冷凝風帽。見說吟情。近來不到謝池草。歡游

曾步翠窈。亂紅迷紫曲。芳意今少。舞扇招香。歌饒喚玉。猶憶錢塘蘇小。無端暗惱。又幾度流連。燕昏鶯曉。回首妝樓。甚時重去好。

王沂孫

一萼紅 石屋探梅作

思飄飄。擁仙姝獨步。明月照蒼翹。花候猶遲。庭陰不掃。門掩山意蕭條。抱芳恨佳人分薄。似未許芳魄化春嬌。雨澀風慳。霧輕波細。湘夢迢迢。誰伴碧尊雕俎。喚瓊肌皎皎。綠髮蕭蕭。青鳳啼空。玉龍舞夜。遙睇河漢光搖。未須賦疏香淡影。且同倚枯蘚聽吹簫。聽久餘音欲絕。寒透鮫綃。

小窗銀燭。輕鬟半擁釵橫玉。數聲春調清真曲。拂拂朱簾。殘影亂紅撲。
垂楊學畫蛾眉綠。年年芳草迷金谷。如今休把佳期卜。一掬春情。斜月杏花屋。

慶宮春水 仙

明玉擎金。織羅飄帶。爲君起舞迴雪。柔影參差。幽香零亂。翠圍腰瘦一
捻。歲華相誤。記前度湘皋怨別。哀絃重聽。都是淒涼。未須彈徹。國
香到此誰憐。煙冷沙昏。頓成愁絕。花惱難禁。酒銷欲盡。門外冰漸初
結。試招仙魄。怕今夜瑤簪凍折。携盤獨出。空想咸陽。故宮落月。

天香 龍涎香

孤嶠蟠烟。層濤蛻月。驪宮夜采鉛水。汎遠槎風。夢深薇露。化作斷魂心
字。紅蕤候火。還乍識冰環玉指。一縷縈簾翠影。依稀海天雲氣。幾回

帶嬌半醉。剪春鐙夜寒花碎。更好故溪飛雪。小窗深閉。荀令如今漸老。總忘卻尊前舊風味。漫惜餘薰。空篝素被。

齊天樂 蟬

一襟餘恨宮魂斷。年年翠陰庭樹。乍咽涼柯。還移暗葉。重把離愁深訴。西窗過雨。怪瑤佩流空。玉笋調柱。鏡暗妝殘。爲誰嬌鬢尙如許。銅仙鉛淚似洗。歎移盤去遠。難貯零露。病翼驚秋。枯形閱世。消得斜陽幾度。餘音更苦。甚獨抱清高。頓成淒楚。漫想薰風。柳絲千萬縷。

法曲獻仙音 聚景亭梅次草窗韻

層綠峩峩。纖瓊皎皎。倒壓波痕清淺。過眼年華。動人幽意。相逢幾番春換。記喚酒尋芳處。盈盈褪妝晚。已消黯。况淒涼近來離思。應忘卻明月夜深歸棹。在萼一枝春。恨東風人似天遠。縱有殘花。灑征衣鉛淚都滿。

但殷勤折取。自遣一襟幽怨。

仇 遠

八犯玉交枝 招寶山觀月上

滄島雲連。綠瀛秋入。暮景卻沈洲嶼。無浪無風天地白。聽得潮生人語。
擎空孤柱。翠依高閣憑虛。中流蒼碧迷烟霧。惟見廣寒門外。青無重數。
不知是水。不知是山是樹。漫漫知是何處。倩誰問凌波輕步。漫凝伫乘鸞
秦女。想庭曲霓裳正舞。莫須長笛吹愁去。怕喚起魚龍。三更噴作前山雨。

姚 雲 文

紫萸香慢

近重陽偏多風雨。絕憐此日暄明。問秋香濃未。待携客。出西城。正自羈
 懷多感。怕荒臺高處。更不勝情。向尊前又憶漉酒插花人。只座上已無老
 兵。淒清。淺醉還醒。愁不肯與詩平。記長楸走馬。雕弓榨柳。前事休
 評。紫萸一枝傳賜。夢誰到漢家陵。儘烏紗便隨風去。要天知道。華髮如
 此星星。歌罷涕零。

僧 揮

金明池

天闊雲高。溪橫水遠。晚日寒生輕暈。閒階靜楊花漸少。朱門掩鶯聲猶
 嫩。悔恩恩過卻清明。旋占得餘芳已成幽恨。卻幾日陰沈。連宵慵困。起
 來留華都盡。怨人雙眉閒闌損。乍品得情懷。看承全近。深深態無非自

許。厭厭意終差人問。爭知道夢裏蓬萊。待忘了餘香。時傳音信。縱留得鶯花。東風不住。也則眼前愁悶。

李清照

聲聲慢

尋尋覓覓。冷冷清清。淒淒慘慘戚戚。乍暖還寒時候。最難將息。三盃兩盞淡酒。怎敵他晚來風急。雁過也。正傷心。卻是舊時相識。滿地黃花堆積。憔悴損如今有誰堪摘。守着窗兒。獨自怎生得黑。梧桐更兼細雨。到黃昏點點滴滴。者次第。怎一個愁字了得。

念奴嬌

蕭條庭院。有斜風細雨。重門深閉。寵柳嬌花寒食近。種種惱人天氣。險

韻詩成、扶頭酒醒。別是閒滋味。征鴻過盡。萬千心事難寄。樓上幾日
 春寒。簾垂四面。玉闌干慵倚。被冷香消新夢覺。不許愁人不起。清露晨
 流。新桐初引。多少遊春意。日高煙斂。更看今日晴未。

醉花陰

薄霧濃雲愁永晝。瑞腦銷金獸。佳節又重陽。玉枕紗厨。半夜涼初透。
 東籬把酒黃昏後。有暗香盈袖。莫道不消魂。簾捲西風。人比黃花瘦。

如夢令

昨夜雨疎風驟。濃睡不消殘酒。試問捲簾人。恰道海棠依舊。知否知否。
 應是綠肥紅瘦。

鳳凰臺上憶吹簫

香冷金猊。被翻紅浪。起來慵自梳頭。任寶奩塵滿。月上簾鉤。生怕離懷

別苦。多少事欲說還休。新來瘦。非干病酒。不是悲秋。休休。者回去也。千萬遍陽關。也則難留。念武陵人遠。烟鎖秦樓。惟有樓前流水。應念我終日凝眸。凝眸處。從今又添。一段新愁。

永遇樂

落日鎔金。暮雲合璧。人在何處。染柳煙濃。吹梅笛怨。春意知幾許。元宵佳節。融和天氣。次第豈無風雨。來相召香車寶馬。謝他酒朋詩侶。中州盛日。閨門多暇。記得偏重三五。鋪翠冠兒。撚金雪柳。簇帶爭濟楚。如今蕉萃。風鬟霧鬢。怕見夜間出去。不如向簾兒底下。聽人笑語。

木蘭花

天工肯放瓊瑤碎。探著南枝開徧未。不知蘊藉幾多時。但見包藏無限意。道人憔悴春窗底。閒拍闌干愁不倚。要來小看使來休。未必明朝風不起。

武陵春

風住塵香花已盡。日晚倦梳頭。物是人非事事休。欲語淚先流。
聞說雙溪春尚好。也擬汎輕舟。只恐雙溪舴艋舟。載不動。許多愁。

朱淑貞

蝶戀花送春

樓外垂楊千萬縷。欲繫青春少住。春還去。猶自風前飄柳絮。隨春且看歸
何處。滿日山川聞杜宇。便做無情。莫也愁人意。把酒送春春不語。黃
昏却下瀟瀟雨。

眼兒媚

風日遲遲弄輕柔。花徑暗香流。清明過了。不堪回首。雲鎖朱樓。
午窓

睡起鶯聲巧。何處喚春愁。綠楊影裏。海棠枝畔。紅杏梢頭。

謁金門

春已半。觸目此情無限。十二闌干閑倚遍。愁來天不管。好是風和日暖。輸與鶯鶯燕燕。滿院落花簾不卷。斷腸芳草遠。

生查子元夕

去年元夜時。花市燈如畫。月上柳梢頭。人約黃昏後。今年元夜時。月與燈依舊。不見去年人。淚濕春衫袖。

又

年年玉鏡臺。梅蕊宮妝困。今歲未還家。怕見江南信。酒從別後疎。淚向愁中盡。遙想楚雲深。人遠天涯近。

吳 激

人 月 圓 宴張侍御家有感

南朝千古傷心地。還唱後庭花。舊時王謝。堂前燕子。飛入人家。恍然
在遇。天姿勝雪。宮鬢堆鴉。江州司馬。青衫淚濕。同是天涯。

春從天上來 感 舊

海角飄零。歎漢苑秦宮。墜露飛螢。夢回天上。金屋銀屏。歌吹競舉青
冥。問當時遺譜。有絕藝鼓瑟湘靈。促哀蟬。似林鶯嘒嘒。山溜泠泠。
梨園太平樂府。醉幾度春風。鬢髮星星。舞徹中原。塵飛滄海。風雪萬里
龍庭。寫胡笳幽怨。人憔悴不似丹青。酒微醒。對一軒涼月。燈火青荧。

